

1 CORINTIOS

Pablo Corinto marārē ōādoredea

1 ¹Yū Pablo, Sóstenes merā musārē ōādoredea. Marīpu gāamederosūta Jesucristo yure ĩgūyare buedoregu beyepimi. Sóstenes Jesúre būremugū, mariyaguta āārīmi. ²Yū ĩgū merā musā Corinto marārē gojāa. Musā Jesucristore būremurā, ĩgū merā ōārō āārīsīā, Marīpuyarā āārā. Marīpu musārē, gajerā āārīpererogue marā marī Opū Jesucristore: “Iritamuka yure!” ārī sērērārē siudi āārīmi ĩgūyarā āārīburo, ārīgū. Jesucristo ĩgūsā Opū āārīmi. Irasū āārīmakū, marīdere marī Opūta āārīmi. ³Marīpu āārīnīgū, marī Opū Jesucristo musārē ōārō iritamu, siuñajārī merā āārīrikumakū iriburo.

Marīpu Jesucristo merā musārē ōārō iritamumi, ārī gojadea

⁴Ūmuriku yū Marīpure usuyari sīnīkōāa Jesucristo iridea merā ĩgū musārē ōārō iritamumakū ĩgū. ⁵Musā Cristo merā ōārō āārīmakū, Marīpu musārē ĩgūyamarē āārīpereri ōārīrē sīdi āārīmi. Irasirīgu musārē ōārō pēmasīrī merā ĩgūyare gajerārē weremakū, irire masīmakū yāmi. ⁶Marīpu irire sīgū, yū musārē: “Cristo ōārō iritamugukumi”, ārīderosūta irire iridi āārīmi. ⁷Irasirirā marī Opū Jesucristo dupaturi aariburire yūrā Marīpu sīrīrē opapeokōāa. ⁸I ūmu peremakūguedere ĩgū turari merā musārē Jesucristore būremunīmakū irīgukumi. Irasirīgu marī Opū Jesucristo dupaturi aarīmakū, marīrē waja opamerā āārīmakū irīgukumi. ⁹Marīpu, ĩgū: “Āsū irīgara”, ārīdeare keoro irīgu āārīmi. ĩgūta musārē beyedi āārīmi, ĩgū magū Jesucristo marī Opū merā ōārō āārīburo, ārīgū.

Pablo Corinto marārē Marīpuyarārē: “Gāme dukawaribirikōāka!” ārī gojadea

¹⁰Yaarā, yū marī Opū Jesucristo dorederosūta musārē āsū ārī weregura. Surosū gūñarī merā werenīka! Musā werenīrī merā gāme dukawaribirikōāka! Ūsuyari merā werenī, surosū gūñarī merā āārīrikuka! ¹¹Yaarā, Cloéya wii marā yure musā gāme werenī guaseorire werema. ¹²Musā āsū ārī gāme guaseoyuro: “Gua Pabloyarā āārā”, ārī guaseoyuro. Gajerā: “Apoloyarā āārā”, gajerā: “Pedroyarā āārā”, gajerā: “Cristoyarā āārā”, ārī gāme guaseoyuro. ¹³Irasū ārī gāme guaseobirikōāka! Marī Cristore būremurā āārā. Irasirirā ĩgū suguyarāta āārā. Gāme dukawarimasīña máa. Yū, musāya āārīburiere curusague boabosabirību. Musā, yū wāi merā wāiyēsūbirību. ¹⁴Yū Marīpure: “Ōāa” ārī, usuyari sīa. Yū musārē deko merā wāiyebirību. Crispo, Gayosā direta wāiyebu. ¹⁵Irasirirā musā: “Gua Pablo wāi merā wāiyēsūnerā āārā”, ārīmasībea. ¹⁶Gajerārē Estéfanaya wii marādere wāiyebu, ārī gūñabu. Gajerāgue tamerārē wāiyebu, ārīmasībirīkoa. ¹⁷Cristo yure wāiyedoregu pībirīmi. ĩgū masakare tauri kere gapure woredoregu pīmi. Irire yure pīgu, masīrīmasā werenīrōsū werenīdrebirīmi. Yū, ĩgūsā irirosū werenīmakū, masaka Cristo curusague boabosadeare pēmasībirībokuma. Irasirirā ĩgū tauburire neō masībirībokuma.

Cristo merā Marīpu turarire, ĩgū masīrīrē masīsūa, ārī gojadea

¹⁸Jesucristore būremumerā peamegue béosūmurā, ĩgū curusague boadea kerere pērā: “Pēmasīmerāya bueri āārā”, ārīma. Marī ĩgū tausūmurā gapure

i kerere pémakü, Marîpu îgû turari merâ marîrê îgûrê bñremumakü yámi. ¹⁹Marîpuya werenîrí gojadea pûge âsü ârí gojasüdero ââribú:

I ñmu marâ masîrîmasâ îgûsâ masîrîrê ubu âârîrí dujamakü irigura. Gajinorê êmabêogu irirosü îgûsâ pémasîrîrê êmagura, âridi âârîmî Marîpu.^a

²⁰Irasirirâ: “Masîpeokôâ”, ârîrâ, ubu âârîrâ dujama. Gajerâ îgûsâ gûñarô buerîmasâde irasûta dujama. I ñmumarê ôârô werenîmasîrîrêde irasûta dujama. I ñmumarê: “Ôârô masîa”, ârikerepuru, Marîpu gapu îgûsâ masîrîrê ubu âârîrí dujamakü yámi. ²¹Marîpu masîgû âârîsîâ, i ñmu marâre îgûsâ masîrî merâ îgûrê masîmakü iribiridi âârîmî. Asü gapu âridi âârîmî. Jesucristoya kerere bñremurârê: “Taugura”, âridi âârîmî. Îgûrê bñremumerâ gapu iri kerere pérâ: “Pémasîmerâya bueri âârâ”, ârîma.

²²Judío masaka iri kerere bñremumerâ: “Marîpu turari merâ gajino iri ñmumakü îârâge bñremurâkoa”, ârîma. Judío masaka âârîmerâ griego masakade i ñmuma îgûsâ masîrî direta masîduama. ²³Gua gapu Jesucristo curusague boadiya kerere werea. Judío masaka iri kerere pérâ: “Îgû guare taugu meta âârîmî”, ârîma. Judío masaka âârîmerêde iri kerere pérâ: “Pémasîmerâya bueri âârâ”, ârîma. ²⁴Marî gapu Marîpu beyenerâ âârîsîâ, iri kerere pérâ: “Marîpu masîgû, turatarîgu âârîsîâ, Cristo iridea merâ marîrê peamegue waabonerârê taugukumi”, âri masîa. Marî judío masaka, judío masaka âârîmerêde Cristore bñremurâ âârîsîâ, irire masîa.

²⁵Cristore bñremumerâ gapu Marîpu îgû masîrî merâ, îgû turari merâ iririre âsü âri gûñama: “Ubu âârîrí âârâ”, âri gûñama. Îgûsâ irasü âri gûñakerepuru, Marîpu masîrî gapu masaka masîrî nemorô ôârî âârîtarînuğârî âârâ. Îgû turari gapu, masaka turari nemorô âârâ.

²⁶Yaará, Marîpu musârê îgûyarâ âârîdoregu siuburo dupuyuro musâ

âârîrikudeare gûñaka! Musâ i ñmu marâ masîrîmasâ, dorerîmasâ, oparâ pûrâ irirosü âârîrâ mérâgâ âârînerâ âârîbú. ²⁷Marîpu, i ñmu marâ masîrârê guyasîurô taridoregu, îgûsâ pémasîmerâ âârîma, ârîrâ gapure beyedi âârîmî. Irasü âârîmakü, i ñmu marâ oparârê guyasîurô taridoregu, ubu âârîrâ gapure beyedi âârîmî. ²⁸Ubu âârîrâ gapure, masaka îâduña marîrâ gapure beyedi âârîmî îgûyarâ âârîburo, ârîgû. Oparâ irirosü âârîrâ gapure ubu âârîrâ dujaburo, ârîgû, irasiridi âârîmî. ²⁹Irasirîgu neô sugu masaku: “Yu gajerâ nemorô masîtarînuğâgû âârîmakü îâgû, Marîpu yure beyedi âârîmî”, ârîmasîbirikumi. ³⁰Musârê Marîpu basita Jesucristo merâ ôârô âârîmakü iridi âârîmî. Irasirîgu Marîpu Cristo merâ marîrê îgûyarê masîmakü yámi. Îgû merâ marîrê: “Ôârâ, waja opamerâ âârîma”, âri îâmi. Irasirirâ marî îgûyarâ, peamegue waabonerâ îgû tausînerâ âârâ. ³¹Irasirîro Marîpuya werenîrí gojadea pûge âsü âri gojasüdero âârîbú: “Neô sugu: ‘Gajerâ nemorô masîtarînuğâgû âârâ’, ârîbirikôâburo. Irasü ârîrôno irîgu marî Opu gapure: ‘Turatarîgu âârîsîâ, marîrê ôatarîro iridi âârîmî’, ârîburo”, âri gojasüdero âârîbú.

Cristo curusague boadea kerere gojadea

2 ¹Yaará, yu musâ pûroge Marîpuya kerere, masaka masîbirideare buegu ejagu, masîrîmasâ diasari werenîrí merâ buerosü buebiribu. ²Yu musâ merâ âârîgû: “Jesucristoya kerere, irasü âârîmakü îgû curusague boadea direta buegura”, âri gûñabu. ³Irasirîgu musâ merâ âârîgû, ubu âârîgû irirosü péñabu. “Gajipoe irîgu yu iri kerere ôârô buemasîbiribokoa”, ârîgû, gûi naradari merâ âârîkubu. ⁴Yu musârê iri kerere bñremumakü gââmegû, masîrîmasâ werenîrôsü buebiribu. Irasirirâ, Marîpu turari, Ôâgû deyomarîgû iritamurî merâ yu musârê iri kerere buemakü

^a 1.19 Is 29.14

pérã: “Diayeta aãrã”, ãrî buremubu.
 5 “Masaka masírî merã ígüsã guare buemakû buremua”, ãrî gûnamakû gããmebiribu. “Marîpu, ígü turari merã guare Jesucristoya kerere buremumakû yami”, ãrî gûnamakû gããmegü, irasü buebu musãrê.

Marî Ôãgü deyomarîgü iritamurî merã Marîpure masía, ãrî gojadea

6 Gua musãrê Jesucristore ôãrô buremurî oparãrê buerã, Marîpu wãro masírî sírî merã buea. Iri masírî i ùmuma meta aãrã. Irasü aãrîmakû, i ùmu marã masakare dorerãya meta aãrã. I ùmuma ígüsã basi masírî pereakôãrokoa. 7 Gua, Marîpu ígü masírî merã irideare, neôgorague masaka ígüsã masîbirideare buea. I ùmu iriburo dupuyuro, Marîpu: “Ásü irigura”, ãrî gûnasiadi aãrîmî. Irasirigü marîrê tauburire, marî ùmugasigüe ígü merã aãrînfurire gûnasiadi aãrîmî. 8 Aãrîpererã i ùmu marã masakare dorerã gapu Marîpu ôãrô gûñadeare pémasîbirinerã aãrîmã. Irire ôãrô pémasîránô aãrîrã, marî Opu Jesucristo ôãtarigüre curusague pábiatú wëjëbiribonerã aãrîmã. 9 Ásü ãrî gojasüdero aãrîbú Marîpuya werenírî gojadea pügue:

Marîpu ígürê maîrãya aãrîburire ôãrô ãmuyusiadi aãrîmî. I ígü ôãrî ãmubosadea, ígüsã neô ñãbiridea, pébiridea, neô mérôgã gûñabiridea aãrã, ãrî gojasüdero aãrîbú.^b

10 Marîpu ígü irideare, marî masîbirideare Ôãgü deyomarîgü merã marîrê masîmakû yami. Ôãgü deyomarîgü Marîpu gûñarîrê masîgü aãrîpererire masîpeokôãmi.

11 Gajigü masakü gûñarîrê marî neô masîbea. Ígü basi ígü gûñarîrê masîmi. Ígü irirosüta Ôãgü deyomarîgü sugüta Marîpu gûñarîrê masîmi. 12 Marîrê i ùmuma direta gûñabirikôãburo, ãrîgü, Marîpu marîrê Ôãgü deyomarîgürê

sîdi aãrîmî ígü irirosü gûñaburo, ãrîgü. Marîrê maîgü, Ôãgü deyomarîgü merã aãrîpererî ígü sídeare masîburo, ãrîgü, irasiridi aãrîmî. 13 Irasirirã gua musãrê Marîpuyare buerã, Ôãgü deyomarîgü masírî sírî merã buea. Gua basi masírî merã buebea. Irasirirã, Ôãgü deyomarîgü guare buedorerosüta ígürê oparãrê buea.

14 Ôãgü deyomarîgürê opamerã, Marîpu Ôãgü deyomarîgü masírî sírîrê gããmebema. Irire gããmemerã: “Ubu aãrîrî aãrã”, ãrîma. Ôãgü deyomarîgü iritamurî merãta marî ígüyare pémasía. Ígürê opamerã gapu ígüyare neô pémasîbema. 15 Marî Ôãgü deyomarîgürê oparã, ígü iritamurî merã aãrîpererî ñerîrê, ôãrîrê ñã beyemasía. Ôãgü deyomarîgürê opamerã gapu, marî ígürê oparã iririre neô ñã beyemasîbirikuma. 16 Marîpuya werenírî gojadea pügue ásü ãrî gojasüdero aãrîbú: “Neô sugü marî Opu gûñarîrê masîgü mámi. Neô suguno ígürê buemasîbirikumî”, ãrî gojasüdero aãrîbú. Marî gapu Ôãgü deyomarîgürê oparã aãrîsîã, marî Opu Cristo gûñarîrê masía.

Marîpuyarã ígürê moãboerã aãrîma, ãrî gojadea

3 1 Yaarã, yu Ôãgü deyomarîgü dorerî irirãrê buerosü musãrê buebiribu. I ùmu marã Ôãgü deyomarîgürê opamerã irirosü musã aãrîmakû ñãgü, irasiribu. Cristoyare musã buremuturabirimakû ñãgü, majîrãgãrê buerosü musãrê buebu. 2 Irasirigü, majîrãgã baarî baamasîmerã, ùpîku dita mirîrã irirosü musã aãrîmakû ñãgü, diasabirî direta musãrê buebu. Daporadere musã diasarî buerire pémasîbea dapa. 3 Musã, Ôãgü deyomarîgürê opamerã irirosü gãme uburikurã, gãme ñãduamerã, gãme dukawariduarã yãa. Irasirirã i ùmu marã ígüsã noô gããmerô iriduarnosü yãa. 4 Musã: “Yu Pabloyagu aãrã”, ãrî werenía. Irasü ãrîrã, i ùmu marã masaka Ôãgü deyomarîgürê opamerã irirosü werenía.

^b 2.9 Is 64.4

⁵ Gwa Apolos merā, ¿nasirirā āārīrī musā iāmakū? Gwa Marīpūre moāboerā āārā. Gwa ĩgū iridorederosūta yāa. Nasirirā gwa Jesucristoya kerere weremakū pérā, musā ĩgūrē buremunugābu. ⁶ Yu neōgoraguere musārē buerūroribu. Irasirigu sugu oteri yerire otegu irirosū iribu. Irasiriadero pūru, Apolos musārē buenemogu, oterire koregu irirosū iridi āārīmī. Marīpū gapu oteri purimakū irirosū musārē Jesūre buremunugāmakū iridi āārīmī. ⁷ Irasirirā oteri yerire oterimasā, korerimasāde ubu āārīrā āārīma. Marīpū gapu iri oterire purimakū irigu āārīmī. ĩgū suguta irire irimasimī. ⁸ Otepūroridi, pūru iri oteadeare koredi ĩgūsā suro merā moāboerimasā āārīma. Marīpū ĩgūsā moaderopā ĩgūsārē keoro wajarigukumi. ⁹ Gwa Marīpuyarā ĩgūrē moāboerā āārā. Musā guayarā āārībea. Marīpuyarā āārā. Irasirirā musā ĩgūya pooere otedea irirosū āārā.

Irasū āārīmakū, musā ĩgū wāri wii irimurīri wii irirosū āārā. ¹⁰ Wii irimerēgū borari keoro nūpūrorigu irirosū, yu, Marīpū iritamurō merā musārē Jesucristoyare keoro buerūroribu. Pūru gajerā musārē buenemorā, iri wiire peomurīārā irirosū irirākuma. Iri wiire odorā irirosū musārē buenemorā, gopeyari merā keoro buero gāāmea.

¹¹ Marīpū Jesucristore sugureta pīdi āārīmī masakare tauburo, ārīgū. Irasirigu yu musārē buegu, Jesucristo masakare tauri kerere buerūroribu. Neō sugano iri kerere gorawayumasibirikumī. ¹² Jesucristoyare oārō keoro buenemorā, oro, plata, gaji wajapari ũtāyeri merā wii irirā peomurīārā irirosū irirākuma. Gajerā gapu pīriri yuku merā, tā merā, mijī pū merā tiāmurīārā irirosū irirākuma. ĩgūsā irirosū gajerā musārē buenemorā, ubu āārīrīrē, mata pererinorē buerākuma. ¹³⁻¹⁴ I ũmu peremakū, Jesucristo masakare ĩgūsā buedeare: “I musā buedea oābu, i oābiribu”, āri weregukumi. Oro, plata, wajapari

ũtāyeri merā iridea gapu peamegue soemakū ũjūbirikoa. Yuku, tā, pūri merā iridea gapu ũjūperekōārokoa. Irasirigu, gajinorē peamegue soegu, ¿dīi ũjūrokuri, dīi ũjūbirikuri? āri beyerosū, Jesucristo ĩgūsā oārō, űerō buedeare beyegukumi. Oārō keoro buedire keoro wajarigukumi. ¹⁵ Oārō keoro buebiridi gapure wajaribirikumī. Gajino ũjūrōsū ĩgū buedea waja, wajataboadea perekōārokoa. ĩgū wajatabirikeregu, peamegue waabirikumi. Tausīgukumi. Wii ũjūmakū duriwiriagu irirosū mérōgā tarigukumi.

¹⁶ ¿Musā masiberi? Oāgū deyomarīgū marīguere āārīmī. Irasirirā Marīpuya wii irirosū āārā. ¹⁷ ĩgūya wii irirosū āārīrā, ĩgūyarā āārā. Irasirigu Marīpū ĩgūyarārē poyanorērānorē poyanorēgukumi.

¹⁸ Musā basi péwisibirikōāka! “Yu i ũmu marā buerire masītarinugāgū āārā”, āribirikōāka! Irire masīmerā irirosū āārīka! Irasirimakū, Marīpū diayeta oārō masīrā dujamakū irigukumi. ¹⁹ I ũmu marā ĩgūsā masīrī, Marīpū iāmakū ubu āārīrī āārā. Marīpuya werenīrī gojadea pūgue āsū āri gojasūdero āārībū: “Marīpū gapu masīrīmasā: ‘Āsū irirāra’, āri gūñaderosū iriduarire iribirimakū yāmī”, āri gojasūdero āārībū. ²⁰ Gajeroguedere āsū āri gojasūdero āārībū: “Marī Opū, i ũmu marā masīrīmasā gūñārīrē masīmī. Irire masīgū: ‘Ubu āārīrī āārā iri’, āri iāmi”, āri gojasūdero āārībū. ²¹ Irasirirā musārē bueguere: “Gajigu nemorō oārō buemi”, āribirikōāka! Marīpū āārīpereri musāya āārībūrire sīsīadi āārīmī. ²² Irasirigu yure, Apolore, Pedrore iriumi musā oārō āārībūrire buedoregu. Irasū āārīmakū, i ũmuma, musāya āārībūrire sīdi āārīmī. Dapora musā āārībūrire, musā boadero pūrugue āārībūridere sīdi āārīmī. I āārīpereri musāya āārā. ²³ Irasū āārīmakū, musā Cristoyarā āārā. Cristo Marīpuyagu āārīmī. Irasirirā musā Cristo merā Marīpuyarā āārā.

Pablo, Jesucristo ĩgūyare buedoregu pīnerā moārīrē gojadea

4 ¹ Musā guare: “Cristo moāboerimasā āārīma”, āri gūñarō

gāamea. Guare Marīpuya kerere, masaka masībirideare buedoregu pidi āārīmī. ²Moārīmasā īgūsā opu dorerire keoro irirā irirosū gua Cristore moāboerimasādere īgū dorerire keoro iriro gāamea. ³Musā yure: “Marī Opuyare oārō buemi, o oārō buebirimi”, āārimakū, neō bujawerebirikoa. Gajerā masaka, yu buerire: “Keoro āārā, o keoro āārībea”, āārimakūdere neō bujawerebirikoa. Yu baside yu buerire: “I gapure oārō buebū, i gapure oārō buebiribū”, āārimasībirikoa. ⁴Yu buedeare gūñagū: “Nerō buekubū”, āāri gūñabea. Irasirigu: “Yu ñerō buedea waja, waja opāa” āārimasībea. Marī Opū suguta yu buerire: “Ōāgorāa, o oābea”, āāri masīmi. ⁵Irasirirā marī Opū i ūmugue dupaturi aariburo dupuyuro gajerārē: “Īgū dorederosū keoro iribema”, āāri werewuabirikōāka! Īgū dupaturi aarigū, āārīpererārē īgūsā irideea gajerā masībirideare masīmakū irigukumi. Īgūsā gūñarīgue: “Āsū iriduakoa”, āāri gūñadeadere masīmakū irigukumi. Irasirigu Marīpū oārō irirārē: “Ōārō iribū”, āāri irigukumi. Īgūsā oārō irideropā īgūsārē keoro irigukumi.

⁶Yaarā, musāya āārīburire gua Apolos merā iririkurire werebū, musāde gua irirosūta iriburo, āāri gū. Marīpuya werenīrī gojadea pūgue īgū dorerire tarinugābirikōāburo, āāri gū, musārē irire werebū. Irasirirā musā guare īākūirā: “Guare buegu gapū, musārē buegu nemorō masītarinugāmi”, āāri birikoa. ⁷Musā gajerā nemorō masītarinugārā āārībea. Āārīpereri musā opari, Marīpū musārē sīdea dita āārā. Īgū sīdea āārīkerepuru, iro tamerārē, ĩnasirirā musā basi: “Īgūyare masīpeokoa”, āārīrī? Īgū musārē masīrīrē sībirimakū, neō masībiribokoa. Īgū musārē masīmakū irideea direta masīa.

⁸Musā i gapure āsū āāri gūñadāa: “Gua āārīpereri opāa. Marīpuyare masīpeokōāa”, āāri gūñadāa. Irasirirā gua musārē īgūyare buenemomakū gāamebea. Musā oparā irirosū: “Āārīpereri masītarinugārā āārā”, āāri

gūñadāa. Musā diayeta oparā irirosū āārīpereri masītarinugārā āārimakū oātari bokoa. Irasirirā gua musārē buerāde musā merā oparā irirosū āārībokoa. ⁹Yu āsū āāri peñāa: “Marīpū guare Jesucristoyare buedoregu pīgu, āārīpererā nemorō ubu āārīrā irirosū āārīdoregu pidi āārīmī”, āāri peñāa. Irasirirā gua wējēbēosūmurā irirosū āārā. Āārīpererā i ūmū marā masaka, Marīpū wereboerā īūrō gua ñerō taria. ¹⁰Jesucristoya kerere gua buemakū, masaka guare: “Pemasīmerā āārīma”, āārīma. Musā gapū musā basi: “Gua Cristoyare pēmasīpeorā āārā”, āārīkoa. Gua, musā īāmakūta ubu āārīrā āārā. Musā gapū: “Gua oparā irirosū āārā”, āārīkoa. Masaka gua gapure ubu īābēokōāma. Musā gapure gopeyarī merā īāma. ¹¹Gua neōgoragueta ñerō taripurorimārīrīnerā, daporaguedere irasūta āārīkōāa. Ūboāa, ñemesibua, surī opabea. Jesucristore buemumerā guare buro ñerō iribirama. Gua buegorenasīā, wiiri opabea. ¹²Irasū āārīmakū, gayaya āārīburire, gua baaburidere, gua basi moāpoyāa. Gajerā guare ñerō werenīmakū, gua gapū Marīpū īgūsāya āārīburire sērēbosāa. Gajerā gua noō waarō guare ñerō irimakū, ubu peñakōāa. ¹³Gajerā guare ñerō āāri werewuamakū, gua gapū īgūsārē āmuduarā, īgūsārē oārō merā werea. I ūmūmarē īgūsā gāamebirire īgūsā bēodea irirosū guare īāma. Neōgoragueta guare doopurorinerā, daporaguedere irasūta doonīkōāma. ¹⁴Iriə gojagu, musārē guyasīrīdoregu meta ya. Yu musārē maīgū, yu pūrāre irirosū werea. ¹⁵Wārā gajerā diez mil gora musārē Cristoyare buebonerā āārīkerepuru, īgū masakare tauri kerere buepuroridi suguta āārīmi. Iri kerere musārē buepuroridi yuta āārā. Yu iri kerere buemakū pērā, musā īgūrē buemunugābū. Irasirigu yu musāpū irirosū āārā. ¹⁶Irasirigu musārē: “Yu iririkurire, majīrā īgūsā pagure īākūirōsū īākūituyaka!” āāri werea. ¹⁷Musā irire irimakū gāamegū, Timoteore musā purogue iriua. Īgū yu

buedi yu magú irirosú, yu maigú aarími. Marí Opu gāamerosú keoro irinikōāmi. Yu Cristore buremugú iririkurire musārē gūnamakū irigukumi musāde irasūta iriburo, ārigū. Irasirigū, āārīpererā Cristore buremurārē āārīpererogue āārīrārē yu buederosūta musārē buegukumi. ¹⁸Surāyeri musā watope āārīrā: “Pablo gua puro aaribirikumi”, āri gūñanūrā. Irasirirā ĩgūsā basi: “Gua gajerā nemorō masitarinugārā āārā”, āri, gūñanikōānūrā. ¹⁹Yu gapu āsū āri gūñāa: “Marí Opu gāamemakū, mata musā pūrogue waagura”, āri gūñāa. Irogue ejagu, masitarinugārā āārā, āri werenīrārē ĩagura. Iri direta ĩābirikoa. “ĪDiyeta ĩgūsā marí Opu turari merā ĩgūyare irirāta yāri?” āri ĩagukoa. ²⁰Marīpu ĩgūyarārē doreri āsū āārā. Marí ĩgūyare werenīkererā irire marí iribirimakū, marí werenīrī wajamāa. ĩgū turari merā ĩgūyare irimakū gāāmemi. ²¹ĪNēonorē gāamekuri musā? ĪMusā pūrogue musā ñerō iriri waja musārē turīgu waamakū gāamekuri, o musā ōārō iriri waja gapure ũsyari merā musārē weregu waamakū gāamekuri?

Ñerō irigure béoka! āri gojadea

5 ¹Gajerā āsū āri kere werema yure. Sugū musā merāmū ĩgū búamorēta marāpokuyupū. Irire pēgu, pēgukakōābu. Gajerā Marīpūre masīmerā āārīkererā, irasūgora ñerō iribema. ²ĩgū ñerī irigu musā merā āārīkererupū, musā gapu: “Gua gajerā nemorō ōārā āārā”, āri gūñāda. Irasū gūñarōno irirā, ĩgū ñerī iriri gapure buro bujawereri merā gūñaka! Irasirirā, ĩgū ñerō iririre piribirimakū ĩārā, ĩgūrē béokōāka! Musā merā nerēdorebirikōāka! ³Yu gapu musā pūrogue āārībirikeregu, yu gūñarī merā musā merā āārīgū irirosū āārā. Irasirigū yu gūñarīgū musārē: “ĩgū ñerō irigure béokōārō gāāmea”, āri gūñasīāa. ⁴Irasirirā musā, marí Opu Jesucristoyarā, ĩgū dorero merā nerēka! Yude, yu gūñarī merā musā merā nerēgū irirosū āārīgukoa. Marí Opu Jesúde

ĩgū turari merā musā merā āārīgukumi.

⁵Musā irasū nerērā, ĩgū ñerō irigure béokōāka, wātea opu Satanás ĩgū gāāmerō ĩgūrē iriburo, ārīrā! Irasirigū ñerō tarigu, ĩgū ñerō iririre pirigukumi. Marí Opu Jesús i ũmugue dupaturi aarigū, ĩgūrē taugukumi.

⁶ĩgū ñerō irigure béomerā: “Gua gajerā nemorō ōārā āārā”, āri gūñabirikōāka! Musā ĩgū ñerō iririre ubu ĩākōārā, āārīpererā musāde ĩgū ñerō iririre pērēbejarākoa. ĪMusā āsū āri wererire masīberi? “Pārē irirā, mérōgā pá wemasārī poga merā trigo pogare morēkuma. Pūru iri wemasāseyakōākoa”, āri werea. Iri poga wemasāseyarosūta ñerīde musāguere ōārō seyakōārokoa. ⁷Irasirirā ĩgū ñerī irigure béoka, gajerāde ñerō iriri, ārīrā! Guayarā, judío masaka pascua bosenu irimurā pá wemasāmakū iriri pogare béokuma. Irire béorosūta musā ñerī iririre béoka, ñerīrē opamerā āārīmurā! Pascua bosenu āārīmakū, judío masaka ovejare wējekuma ĩgūsā ñerī iridea wajare Marīpūre bēodorerā. Oveja boaderosūta Cristo marí ñerō iridea waja boabosadi āārīmī Marīpu marīrē: “Ñerī marīrā āārīma”, āri ĩāburo, ārigū. ⁸Irasirirā marí ñerī iririkudeare pirikōārō gāāmea. Ñerīrē iriro marīrō, āārīrō gāāmea. Irigatori marīrō, diayema ōārō werenīrī merā āārīrō gāāmea.

⁹Yu musārē iripoegue gojadea pūgue āsū āri gojabu: “Nomerē ñerō gāmebirarikūrārē wapikūbirikōāka!” āri gojabu. ¹⁰Yu irasū gojagu: “Īārīpererā ñerō iririmasā i ũmugue āārīrārē neō wapikūbirikōāka!” ārigū meta iribu. I ũmugue noó musā waaró Jesúre buremumerā āārīma. Nomerē ñerō gāmebirarikūrā, gajerāyare buro gāāmerā, yajarimasā, keorī weadeare buremurīmasā wārā āārīma. ĩgūsā āārīpererogue āārīmakū, ĩgūsāno marīrōgue waamasīña maa. ¹¹ĪĀsū gapu āri gojabu: “Surāyeri musā merā āārīrā: ‘Jesúre buremua’, ārīkererā ñerī iririkumakū ĩārā, ĩgūsārē wapikūbirikōāka!” āri gojabu. “Irasirirā

nomerê ñerô gãmebirarikurârê,
gajerâyare bũro gããmerârê, keori
weadeare bũremurârê, gajerârê
ñerô kere wererârê, mejãrikurârê,
yajarikurârê wapikũbirikõãka!
Irasiririkurãno merã neõ baabirikõãka!”
ãrĩ gojabũ. ¹²⁻¹³Marĩpu Jesũre
bũremumerârê igũsã ñerô irideã waja
wajamoãgũkumi. Irasirigu yũ musãrê:
“Wajamoãka igũsãrê!” ãrĩbeã. Musã
tamerã musã merã ããrĩrãrê igũsã ñerô
irimakũ iãrã, igũsãrê wajamoãka!
Marĩpũyã wenenĩrĩ gojãdeã pũgue
gojãderosũta irika! Æsũ ãrĩ gojãsũdero
ããrĩbũ: “Sugũ musã merã ããrĩgũ ñerô
irimakũ iãrã, igũrê beokõãka!” ãrĩ
gojãsũdero ããrĩbũ. Irasirirã musã merã
ããrĩgũrê igũ bũamorê ñerô irigure
beokõãka!

**Jesũre bũremurã gãme
weresãrĩrê gojãdeã**

6 ¹Musã basi gãme guaseorã,
¿nasirirã weresãrĩrê beyerimasã
Jesũre bũremumerã pũroguẽ ãmudorerã
waari? Jesũre bũremurãrê musã
merãmarãrê weresãduãrã, gajerã Jesũre
bũremurãrê irire ãmudorerã waarõ
gããmeã. ²¿Ire musã masĩberĩ? I ãmu
peremakũ, marĩ Jesũre bũremurã
Marĩpũyarã ããrĩsã, Jesũs merã i ãmu
marãrê dorerã ããrĩrãkoã. Irasirirã
igũsãrê doremurã daporãderã marĩ
gãme guaseorire ãmudoremasĩa.
³¿Iderẽ masĩberĩ musã? Marĩ Jesũs
merã Marĩpũre wereboerã ãmũgasigũ
ããrĩrãrê dorerãkoã. Irasirirã igũsãrê
doremurã ããrĩsã, i ãmũmadere
ãmudoremasĩa. ⁴¿Nasirirã i ãmũmarê
gãme guaseorã, Marĩpũyare masĩmerã
pũroguẽ irire ãmudorerã waari? ⁵Musãrê
gũyasĩrĩburo, ãrĩgũ, ire gojãã. ¿Musã
watopegũere neõ sugũ masĩgũ, musã
guaseorire ãmũgũno marĩgorakõãrĩ?
⁶Musã merãmu masĩgũno gapũre
ãmudorerono irirã, gajigũ Jesũre
bũremugũrê weresãduãrã, Jesũre
bũremumerã pũroguẽ ãmudorerã waãã.
⁷Irasiriro, musã gãme guaseorã, musã
basi ãmũmasĩmerã, Jesũre bũremumerã

pũroguẽ irire ãmudorerã waamakũ
õãbeã. Igũsãrê weresãrõno irirã,
gajerã Jesũre bũremurã musãrê diaye
iribirideare, musãrê yajãdeare irasũ
iãkõãmakũ nemorõ õãboakuyo. ⁸Musã
Jesũre bũremurã ããrĩkererã, gajerã
musãyarãrê diaye irimerã, musãde
igũsãyare yajarã yãã.

⁹¿Ire musã masĩberĩ? Ñerô iririkurã
Marĩpu igũyarãrê dorerogũere
waabirikuma. Ire pẽwisibirikõãka!
Ëma nomerê ñerô gãmebirarikurã,
keori weadeare bũremurĩmasã, gajigũ
marãpore ãma marãpokurã, gajego
marãpu merã ñerô iririkurã, ãma
seyaro igũsã dupũri merã ñerô iririkurã,
nomede igũsã seyaro ñerô iririkurã
Marĩpu pũroguẽ neõ waabirikuma.
¹⁰Irasũ ããrĩmakũ, yajarĩmasã,
gajerâyare bũro gããmerĩmasã,
mejãrikurã, gajerãrê ñerô kere
wererĩmasã, ãrĩgatori merã gajerãyare
yajarĩmasã neõ Marĩpu pũroguẽ
waabirikuma. ¹¹Iripoeguere musã
surãyeri irasiririkurã ããrĩnerã ããrĩbũ.
Irasiririkurã ããrĩkerẽpũru, Marĩpu
musã ñerĩ oparire koedi ããrĩmĩ igũyarã
ããrĩmakũ irigu. Irasirigu musãrê:
“Õãrã, waja opamerã ããrĩma”, ãrĩ iãmi.
Marĩ Opũ Jesucristo irideã merã, Õãgũ
deyomarĩgũ musãguere ããrĩrĩ merã
irasũ ãrĩ iãmi.

**Marĩyã dupũ merã õãrõ
iridoreã, ãrĩ gojãdeã**

¹²Masaka surãyeri ãsũ ãrĩ werenĩma:
“Marĩ iridũarire noõ gããmerõ irimasĩa”,
ãrĩ werenĩma. Irasũta ããrã, ãrĩrõ tamerã.
Yũ iridũari gajerãrê iritamubirimakũ
iãgũ, irire iribeã. Irasirigu irire
piridũagũ, pirikõãrõ gããmeã. ¹³I masaka
wenenĩrĩ diayeta ããrã. Æsũ ãrĩ werenĩma:
“Baari, marĩyã paruma ããrĩburi ããrã.
Marĩyã paru, baari baasãdiru ããrã”,
ãrĩ werenĩma. Marĩpu gapũ i pe wãrẽ
peremakũ irigũkumi. Irasiriro baari,
marĩyã paru irasũ ããrĩkõãrõ yãã. Æsũ
gapũ ããrã. Marĩpu, marĩyã dupũ irigu,
ñerĩrê waribejaburi dupũre iribiridi
ããrĩmĩ. Marĩ Opũ Jesucristo gããmerĩ

gapure iriburi dupu aarã. Igũta marĩ merã aarĩgũ marĩya dupu Opu aarĩmĩ irire oãrõ iribu. ¹⁴Marĩpu igũ turari merã marĩ Opu Jesucristo boadero puru, igũya dupure masũdi aarĩmĩ. Igũrẽ masũderosũta marĩ boadero puru, marĩya dupudere masũgukumi.

¹⁵¿Ire musã masĩberi? Marĩ Cristoyarã aarĩmakũ, marĩya dupu, igũya dupuma aarĩrĩ irirosũ aarã. Marĩ irasũ aarĩrã, nomeõ ũma merã ñerõ iririkurimasõ merã ñerõ irimakũ õabirigorakõãa. Irasirirã irinorẽ neõ iribirikõãdorea.

¹⁶¿Idere musã masĩberi? Marĩpuya werenĩrĩ gojadea pũgue asũ arĩ gojasũdero aarĩbũ: “Ũmũ, nomeõ merã marãpokũgu, pẽrã aarĩkererã, Marĩpu iãmakũ su dupu irirosũta aarĩrãkuma”, arĩ gojasũdero aarĩbũ. Irasirigu sugu ñegõ merã marãpokumakũ, igũya dupu igoya dupu merã aarĩrõ, su dupu irirosũta aarã. ¹⁷Irasũta sugu marĩ Opu Jesucristore buremugũ igũ merã pẽrã aarĩkererã, su dupu irirosũta aarĩma. Irasirirã su gũnarĩta opama.

¹⁸Irasirirã ũma nomerẽ gãmebirarire neõ iribirikõãka! Gaji marĩ ñerõ iririre irirã, marĩya dupũguere ñerõ iribe. Ũma igũsã marãposã nome aarĩmerã nomerẽ gãmebirarã gapu igũsã basi igũsãya dupure ñetariro irirã yama. Cristoya dupũguere ñerõ irirã irirosũ yama. ¹⁹¿Musã ire masĩberi? Marĩpu marĩrẽ Oãgũ deyomarĩgũrẽ sĩdi aarĩmĩ. Irasirigu Oãgũ deyomarĩgũ marĩguere aarĩmakũ, marĩya dupu igũya wii irirosũ aarã. Irasiro marĩya dupu marĩya dupũgora aarĩbea. ²⁰Marĩpu marĩrẽ buru maĩgũ, Jesucristore iriudi aarĩmĩ marĩ ñerĩ iridea wajare wajaridoregu. Igũyarã aarĩburo, arĩgũ, irasiridi aarĩmĩ. Irasirirã marĩ igũ wajarinerã aarĩsã, marĩya dupu merã Marĩpu gããmerõsũta iriro gããmea gajerãde igũrẽ buremuburo, arĩrã.

Mojõsiarimarẽ gojadea

7 ¹Daporare musã yure sërẽña gojadeare yujũgura. Marãpokubirimakũ, marãpokubirimakũ,

õãgorãa. ²Irasũ aarĩkererepuru, aarĩpereroguerẽ ũma nomerẽ gãmebirari aarã. Irasirirã ũma igũsãku marãpokuro gããmea, gajerã nome merã ñerõ iriri, arĩrã. Nomeõ igũsãku marãpokuro gããmea, gajerã ũma merã ñerõ iriri, arĩrã. ³Marãpokũgu igũ marãpo merã oãrõ aarĩrikuro gããmea. Igode marãpu merã oãrõ aarĩrikuro gããmea. ⁴Marãpokũgore igoya dupu igoya dita aarĩbea. Igo marãpu gããmerõsũta igũ merã aarĩrõ gããmea. Igo marãpudere igũya dupu igũya dita aarĩbea. Igũ marãpo gããmerõsũta igo merã aarĩrõ gããmea. ⁵Asũ iriburo. Igo marãpu igo merã aarĩduamakũ yujũburo. Igũde igore yujũburo. Igũsã Marĩpũrẽ sërẽmurã: “Irikũnrĩ marĩ iririkurinerõ iribirikõãrã”, arĩ amuadero puru merẽ irasũ iribirikõãburo. Marĩpũrẽ sërẽ odoadero puru, dupaturi igũsã aarĩrikũderosũta aarĩburo doja. Igũsã irasiribirimakũ, wãtĩ igũsãrẽ gajerã merã ñerõ irimakũ iribokumi.

⁶Yũ musãrẽ ire dorerigora irirosũ werenĩgũ meta yãa. Musa irasũ irimakũ õãrokoa, arĩgũ, irasũ arã. ⁷Yũ asũ arĩ gũñaã. Aarĩpererã musã yũ irirosũta marãpo marĩrã aarĩmakũ gããmeadikoa. Marĩpu gapu marĩ aarĩpererãrẽ surosũ pĩbiridi aarĩmĩ. Surãyerire marãpo marĩmurãrẽ, o marãpu marĩmurãrẽ pĩdi aarĩmĩ. Gajerã gapure marãpokũmurãrẽ, o marãpokũmurãrẽ pĩdi aarĩmĩ.

⁸Irasirigu musã marãpo marĩrãrẽ, marãpu marĩrãrẽ, wapiweyarã nomerẽ asũ arã. Yũ irirosũ musã marãpokubirimakũ, o marãpokubirimakũ õãgorãa. ⁹Ũma, nome merã aarĩduarire nugãmerãno marãpokuburo. Nomede irasũta iriburo. Igũsã marãpokumakũ, marãpokumakũ õãgorãa. Irasirirã igũsã nome merã, ũma merã aarĩduari direta gũnanĩbirikuma.

¹⁰Marãpokũrãrẽ, marãpokũrãrẽ yũ asũ dorea. I yũ doreri aarĩbea. Marĩ Opu ire doredi aarĩmĩ. Asũ arĩ doredi aarĩmĩ: “Nomeõ igo marãpũrẽ beõbirikõãburo”.

¹¹Nomeõ igo marãpũrẽ beõgo, gajĩgure marãpokubirikõãrõ gããmea. Igo marãpu

äärídi merä amubeo, sugota aaríkoārō gāamea. Ūmūde igū marāpore béobirikōārō gāamea. Igūde igū marāpo aarídeo merä amubi, marāpo marīgūta aaríkoārō gāamea.

¹²Gajerārē yū gūnarīrē weregura marī Opū weredoredea aaríbirikerepuru. Āsū ārā. Sugu Jesúre bremugū, Jesúre bremubeore marāpokuadero puru, igo igū merāta dujaduamakū, igore béobirikōārō gāamea. ¹³Nomeōde Jesúre bremugō Jesúre bremubire marāpukugo, igo merā igū dujaduamakū, igūrē béobirikōārō gāamea. ¹⁴Sugu Jesúre bremubi marāpo Jesúre bremugō aarímakū iāgū. Marīpu igūrē: “Yaagu irirosū aarími”, ārī iāmi. Irasūta sugo Jesúre bremubeo marāpu Jesúre bremugū aarímakū iāgū, Marīpu igore: “Yaago irirosū aarímo”, ārī iāmi. Igū irasū tābirimakū, igūsā pūrā Jesúre bremumerā pūrā irirosū aaríbokuma. Irasirigu igūsā pūrādere Jesúre bremurā pūrā irirosū iāmi.

¹⁵Jesúre bremubi gapu igū marāpo Jesúre bremugōrē béoduagu, béoburo. Irasūta Jesúre bremubeo igo marāpu Jesúre bremugūrē béoduago, béoburo. Marīpu marīrē gajerā merā gāmekēārō marīrō usuyari merā aarímakū gāamemi. Irasirirā igūsā béoduamakū oāgorāa.

¹⁶Jesúre bremugō, igo marāpu Jesúre bremubire: “Yū merā aarīgū, bremugukumi”, ārīmasīna máa. Irasūta Jesúre bremugū, igū marāpo Jesúre bremubeore: “Yū merā aarīgō, bremugokumo”, ārīmasīna máa.

¹⁷Āsū iriro gāamea marīrē aarípererā marī Opū Jesucristoyārē. Marīpu marīrē Jesúre bremunugādogegu siuideapoe igū marīrē: “Āsū irika!” ārī píderosūta iriwāgārō gāamea. Yū irire aaríperero marārē Jesúre bremurārē dorea. ¹⁸Marīpu sugure igūya dupuma gasirogārē^c wiirisūdire siiumakū, irasūta dujaro gāamea.

Irasūta wiirisūbire siiumakū, wiirisūbita dujaro gāamea. ¹⁹Daporare wiirisūnerā aarírī, wiirisūbirinerā aarírīde wajamāa. Marīpu dorerire marī iriri gapu wajakutarinugāa. ²⁰Irasirirā Marīpu marīrē masakakure siuideapoe igū marīrē píderosūta iriwāgārō gāamea.

²¹Marīpu musārē siuideapoe surāyeri gajerārē moāboerimasā aarībā. Irasū aaríkererā, musā moāboerimasā aarírīrē gūnarikubirikōāka! Gajipoe musā oparā musārē wiuduamakū, wirika! ²²Marīpu musārē marī Opū Jesucristore bremudoregu siudi aarímí. Irasirirā surāyeri musā gajerārē moāboerimasā aaríkererā, daporare Jesucristoyarā igū wiunerā irirosū aarā igūyare irimurā. Musā gajerārē moāboerimasā aaríbirikererā, daporare Jesucristore moāboerā aarā. ²³Marīpu marīrē igūyarā aarīburo, ārīgū, igū magū Jesucristo boagu dí béodea merā wajaridi aarímí. Irasirirā masakare moāboerā irirosū aaríbirikōāka! Masaka gāamerīnorē iribirikōāka! Marīpu gāamerī gapure irika!

²⁴Irasirirā, Marīpu musārē Jesucristore bremunugādogegu siuideapoe musārē píderosūta igū merā oārō aarínfōāka!

²⁵Daporare musā marāpo marīrārē, marāpu marīrādere wereduakoa. I yū wereburi marī Opū weredoredea aaríbea. Irasū aaríbirikerepuru, yū basi gūnarī merā musārē weregura. Marī Opū yure boponarī merā iāsīa, yure iritamumi. Irasirirā musā yū wererire: “Irimakū oāgorāa”, ārī masīrākoa. ²⁶Daporare marīrē wārī ñerō tariri aarā. Irasirirā musā aarírikurosūta dujamakū oāgorāa. ²⁷Marāpokurā, marāpukurā gāme béobirikōāka! Marāpo marīrā, marāposā nome āmabirikōāka! ²⁸Yū musārē irire werekerepuru, musā marāpokurā, Marīpu dorerire tarinugāa meta yāa. Nomeōde marāpukugo, Marīpu dorerire tarinugāgō meta yāmo. Irasū

^c 7.18 Gn 17.1-14: Iripoegue Marīpu Abrahārē igū pūrā ūmarē: “Yaarā aarīburo”, ārīgū, igūsāya dupuma gasirogārē wiiridoredi aarímí. Puru iri dorerire Moisére pídi aarímí. Irasirirā judfo masaka Abraham parāmerā aaríturiarā iri dorerire irirā, igūsā pūrā ūmarē su mojóma pere gajī mojó ūreru pērebejarinarī waarō merā igūsā deyoadero puru irasū yāma.

ääríkerepuru, marāpokurā, marāpukurā gapu igūsā okarinurirē poyari merā āārīrākuma. Irasirigu yu irire: “Poyari merā āārībokuma”, ārigū: “Marāpo marīrā, marāpu marīrā āārīkōāka!” ārā musārē.

²⁹Yaarā, yu musārē irasū ārigū, āsū ārīduagu yāa. Marī i ūmugue āārīrikuri pereburo mērō duyāa. Irasirirā daporare marāpo marīrā Marīpuyare oārō moārōsūta marāpokurādere oārō moārō gāamea. Marāpukurā nomede irasūta Marīpuyare oārō iriro gāamea. ³⁰Marī orekererā, bujoweremerā irirosū āārīrō gāamea. Ūsuyakererā, ūsuyari merā bosenu irimerā irirosū āārīrō gāamea. Gajino wajarikererā: “I yaa āārīnīkōārokoa”, āri gūñabirikōārō gāamea. Irasirirā, marīrē Marīpuyare oārō iriro gāamea. ³¹I ūmuma marī īārī perewāgārō yāa. Irasirirā i ūmumarē iriduare buro gūñarikubirikōārō gāamea.

³²Yu musārē gūñarikuro marīrō āārīmakū gāamea. Marāpo marīgū, marī Opuyare oārō gūñami. Irasirigu igūrē ūsuyamakū gāamegū, igūyare oārō yāmi. ³³Marāpokugu gapu igū marāpo oārō ūsuyari merā āārīmakū gāamegū, i ūmumarē gūñami. ³⁴Irasirigu marī Opū gāāmerirē, igū marāpo ūsuyamakū gāāmeri gapūdere gūñami. Nomedere irasūta āārā. Marāpu marīgō marī Opuyare oārō gūñamo. Igo gūñarī merā Marīpuyago oārō āārīduago, igū gāāmerōsūta iriduamo. Marāpukugo gapu igo marāpu oārō ūsuyari merā āārīmakū gāamegō, i ūmumarē gūñamo.

³⁵Yu musārē oārō waaburo, ārigū, marī Opū gāāmerī direta keoro iridoregu ire gojāa. Musārē marāpokurire, marāpukurire kāmutagu meta yāa.

³⁶Sugu igū magō búro waamakū īāgū, āsū ārībokumi: “Yu magōrē oārō iribirikoa. Igo marāpukmakū oābokoa”, ārībokumi. Irasū ārigū nomesukōāburo. Irasiriri, űerō iriri āārībea.

³⁷Gajigu gapu: “Nomesuro gāamekoa”, ārībiribokumi. Āsū gapu ārībokumi: “Yu

magō marāpukubirikōāburo”, ārībokumi. Igū irasū ārīmakū, igore oārō waabokoa. Igū irasū iriduare oāgorabokoa.

³⁸Magōrē marāpukudoregu, oārō irigu yāmi. Irota marāpukudorebi gapu nemorō oārō iritarinugāgū yāmi. Daporare marīrē wāri űerō tariri āārā. Irasiriro marāpukubirimakū, marāpokubirimakū nemorō oāa.

³⁹Marīpu marīrē doreri āsū ārā. Marāpukugo igo marāpu okamakū, igū merā āārīnīkōāburo. Igū boadero purugue, gajigu igo suyuwore marāpukumasīgokumo igū Jesure buremugū āārīmakū. ⁴⁰Yu gapu āsū āri gūñāa. Igo dupaturi marāpukubeo, nemorō ūsuyabokumo. Yude, gajerā musārē buerimasā irirosū Oāgū deyomarīgūrē opāa. Irasirigu irire werea musārē.

¿Keori weadea puro baari pídeare baamakū oākuri? āri gojadea

8 ¹Dapora musā: “¿Keori weadea puro baari pídeare baamakū oākuri?” āri sērēñadeare yuujugura. Musā irire masīa. Igūsā buremurī weadea neō wajamāa. Irasirirā: “Gua tamerā oārō masīa”, āri gūñarā, gajerārē masītarinugāduarā irirosū yāa. Gajerārē maīrā, āsū gapu iriro gāamea. Nemorō igūsārē Marīpuyare burememomakū iriro gāamea. ²Sugu: “Masīpeokōāa”, ārigūno, oārō masībemi. Wāri duyāa igū masībiri. ³Marīpu igūrē maīgū gapure masīmi. “Yaagu āārīmi, igūrē masīa”, ārīmi.

⁴Irasirigu yu musārē keori weadea puro baari pídea baarire weregura. Diayeta āārā. Igūsā buremurī weadea neō wajamāa. Gajigu, Marīpu irirosū āārīgū neō māmī. Igū suguta āārīmi. ⁵Gajerā masaka igūrē buremumerā wārā gajerānorē buremuma. Ūmarōgue āārīrārē, i ūmugue āārīrārē buremuma. “Marī buremurā, marī oparā āārīma”, āri buremuma. ⁶Marīpu suguta āārīpererire iridi āārīmi. Irasirirā marī igūyarā āārīsīa, igū dorerire irimurā āārā. Irasū āārīmakū, Jesucristo suguta marī Opū

äärími. Ígū merā Marīpū aārīpererire iridi aārímí. Ígū merā marídere ígūyarā aārímakū iridi aārímí. Irasirirā ígū merā aāríníkkōārākoa.

⁷Yū wereri diaye aāríkerepuru, surāyeri Jesúre bñremurā irire masíbema. Iripoegue keori weadeare bñremunerā aārísíā, daporadere iri keori weadea pūro baari pídeare baarā: “Marí bñremunerā keori weadeare bñremurā yāa”, āri gūñadima. Irasirirā ōārō masímerā irire baarā: “Nērō irirā yāa”, āri gūñadima. Irasū gūñakererā, irire baakōāma. ⁸Marí irire baarā, Marīpū merā nemorō ōārō aārímasíbirikoa. Gajerā nemorō ōārā waabirikoa. Irire baamerāde, gajerā nemorō ñerā waabirikoa. ⁹Irasū aāríkerepuru, ōārō pémasíka! Musā noó gāamerō baarā, gajigu Jesúre bñremuturabire ñerō irimakū iribirikōāka! ¹⁰Āsū aārā. “Ígūsā bñremurí keori weadea neó wajamāa”, āri masía. Irasirirā iri keori weadeare bñremurímasā baarogue baarā: “Ōābea”, āri gūñabea. Jesúre bñremuturabi gapū, musā irogue baamakū íāgū: “Irogue baarā, Marīpūre bñremubema”, āri gūñabokumi. Irasū āri gūñakeregu, musārē íākūí, ígūde baakōābokumi. Irasū baagu: “Nērō irigu yāa”, āri gūñabokumi. Ígū irasū gūñamakū, musā ígūrē ñerō irimakū irirākoa. ¹¹Musā ōārō masírā irogue baarā, gajigu ōārō masíbi gapure ñerō irimakū iribokoa. Cristo ígūdere boabosadi aārímí. Irasirirā musā baari merā Cristoyagure poyanorēbokoa. ¹²Irasū aārímakū, gajigu ōārō masíbire: “Irire baamakū ñegorāa”, āri gūñakeregu irire baamakū irirā, Cristodere ñerō irirā yāa. ¹³Irasirigu yu baari merā gajigu Cristoyagure ñerō irimakū iribokoa, ārígū, iri baarire neó dupaturi baabirikoa.

**Jesús buedoregu pídi ígū
wajatarimarē gojajadea**

9 ¹Jesucristo yure ígūyare buedoregu pídi aārímí. Irasirigu yude gajerā ígū buedoregu pínerā irirosūta irimasía.

Yude marí Opu Jesúre íadita aārā. Irasū aārímakū, yu musārē ígūya kerere buemakū pérā, ígūrē bñremunūgābū.

²Gajerā yure: “Ígū Jesús buedoregu pídi meta aārímí”, āri werewuakerepuru, musā gapū irasū āribea. Yu buemakū pérā, musā Jesúre bñremubū. Irasirirā ígūrē bñremurā aārísíā, yure: “Ígū Jesús buedoregu pídi aārímí”, āri masía.

³Yure werewuarārē āsū āri yujūgura. ⁴Yu musārē bueri waja, musā yure baari ejo, iiriri tíamakū ñeāmasía. ⁵Gajerā Jesús buedoregu pínerā, ígū pagupūrā, Pedrosā bñegorenarā, ígūsā marāposā nomerē āīānama. Ígūsā irirosūta yude Jesucristore bñremugorē marāpokugū āīānabokoa. ⁶¿Naāsū gūñarí musā? Gajerā Jesús buedoregu pínerā musārē buerā, ígūsā baaburire moā wajatabema. ¿Nasirirā yu, Bernabé musārē buerā, gua baaburire wajataduarā, moāduumasíbirikuri? ⁷Surara ígū baaburi waja ígū basi wajaribirikumi. Ígū surara moārí waja ígū oparā gapū irire wajaribosakuma. Iguidari otedi, ígū otedea dukare tea, baamasíkumi. Ovejare koregude, ígūsāya ūpikure bipi, iirímasíkumi. ⁸Yu musārē irasū ārígū, masaka gūñarí merā werebea. Yu ārírōsūta Marīpū doreri gojajadea pūgue āsū āri gojasūdero aārībá: ⁹“Weku trigo yeri gasirire ígūya guburi merā kura koro, trigore baadugū baaburo. Ígūya disi túsārí berore túsābirikōāka!” āri gojasūdero aārībá. Marīpū irire doregu, wekuayama direta ārígū meta iridi aārímí. ¹⁰Irire doregu, gua ígūya kerere buerāya aārībūrire ārígū iridi aārímí. Āsū aārā. Sugu oteburere āmukumi. Puru gajigu iro otedea dukare seakumi. Irasirirā iri otedea dukare dukawaburire gūñarā, pēragueta ōārō moākuma. ¹¹Gua musārē Marīpūya wereníríre buerā, oterimasū ígū oteri yerire otegu irirosū iribu. Oterimasū ígū moārí waja, ígū otedea dukare seamasíkumi ígūya aārībūrire. Irasiriro, gua musārē bueri waja, musā guaya aārībūrire gajino guare símakū ōābokoa. ¹²Musā guare síbirikererā, gajerā buerā musārē

sêremakû, îgûsâ gapure sîyuro. Gua gapu îgûsâ nemorô sêremasîa musârê bueri waja.

Gua musârê: “Sîka!” âribonerâ âârîkererâ, neô irasû ârîbea. “Îgûsâ Cristoya kerere pêduabiribokuma gua îgûsârê gajinorê sêremakû”, ârî gûñabu. Irasirirâ gua gâamerîrê opabirikerepuru, musârê neô sêrêbiribu. ¹³Musâ ire masîa. Marîpuya wiigue moârîmasâ, Marîpüre bûremurâ waibu diî ârî sîdeare baama îgûsâ iroque moârî waja. Iri wiima waimurârê wêjê soepeoro puro moârâde irireta baama. ¹⁴I irirosûta marî Opû îgûya kerere wererâya âârîburire âsû ârîdi âârîmî: “Îgûsâ moârî merâ îgûsâ baaburire wajata baaburo”, ârîdi âârîmî. ¹⁵Irasû âârîkererepuru, yu gapu musârê:

“Sîka!” neô ârîbiribu. Daporadere gojagu, musârê gajino sêrêgû meta gojâa. Uaboari merâ boakeregu, musârê buedea waja neô wajaseabirikoa.

Irasirigu wajamarîrô musârê usuyari merâ buea. Yu musârê buedea waja merâ neô wajata baabirikoa.

¹⁶Marîpu yure îgû masakare tauri kerere weredoregu pîdi âârîmî. Irasirigu yu iri kerere weregu: “Gajerâ nemorô masîtarinugâgû âârâ”, neô ârî gûñabea. Iri kerere werebi, bûro bujawereri merâ ñerô taribokoa. ¹⁷Iri kerere yu basi yu gûñarî merâ buegu, wajatabokoa. Marîpu yure doredoresûta iri kerere buegu, îgû yure pîdea gapure irigu yâa. Îgû yure pîderosûta iriro gâamea. Gaji gapure neô irimasîña mâa. ¹⁸Irasirigu Jesucristoya kerere buegu, yu bueri waja musârê: “Wajarîka!” ârî sêrêbuno âârîkereregu, irire neô sêrêbiribu. Yu irasirimakû, yu wajatari âsû âârâ: “Jesucristo îgûrê bûremurârê taugukumi”, ârîrî kerere wajamarîrô buegu, ôârô usuyari merâ âârâ. Irita âârâ yu wajatari.

¹⁹Masakare moâboegu neô âârîbirikeregu, âârîpererârê moâboegu irirosû irigu yâa, îgûsâ Jesucristoya kerere pèburo, ârîgû. Wârâ îgûrê bûremumakû gâamegû, irasû yâa.

²⁰Irasirigu yaarâ judîo masaka merâ âârîgû, îgûsâ ôârî iririkurosûta yâa,

îgûsâ Jesûre bûremumakû gâamegû. Âsû âârâ. Îgûsâ Moîsês dorerire bûremuma. Yu Moîsês doreri direta bûremugû âârîbirikeregu, îgûsâ merâ âârîgû, îgûsâ iririkurosûta yâa, yu buerire pèmakû gâamegû. ²¹Moîsês dorerire bûremumerâ merâ âârîgû, îgûsâ ôârî iririkurosûta yâa, îgûsâde Jesûre bûremumakû gâamegû. Irasirikeregu, Cristore bûremusîa, Marîpu dorerire tarinugâbea. ²²Jesûre bûremuturamerâ merâ âârîgû, îgûsâ ôârî iririkurosûta yâa, îgûsâde Jesûre bûremunemoburo, ârîgû. “Musâ nemorô Jesûre bûremugû, îgûyare masipeogu âârâ”, neô ârîbea îgûsârê. Irasirigu âârîpererâ ôârî iririkurosûta yâa: “Surâyeri yu buerire pèrâ, tausûrâkuma”, ârîgû. ²³I âârîperereri irasû yâa: “Jesucristo îgûrê bûremurârê taugukumi”, ârîrî kerere îgûsâ ôârô pèburo, ârîgû. Îgûsâ iri ôârî kerere bûremumakû îâgû, yu îgûsâ merâ bûro usuyâa.

²⁴Musârê i keori merâ âsû ârî werea. Ūma birarîmasâ, âârîpererâ ūmakererâ, wajataperebirikuma. Ūmaturagu dita wajatakumi. Irasirirâ, wajatadûagu bûro ūmaderosûta musâde Marîpu gâamerîrê ôârô irika, îgû sîburire wajatamurâ! ²⁵Âârîpererâ ūma biramurâ îgûsâ ūmaburi dupuyuro ôârô ūma buekuma. Âârîpereri îgûsâya dupure poyanorêrîrê pirikôakuma. Olivo wâikudîma pûrî merâ iridea berore wajataduarâ, irasû ūma buekuma. Puru gajerârê îmurâ, wajatadiya dipurugue iri berore peokuma. Iri bero mata boakôakoa. Marîde Marîpuyare ôârô buero gâamea. Ñerîrê pirikôâ, îgû gâamerî gapure iriro gâamea, îgû sîburire wajatamurâ. Îgû sîrî neô boabirikoa. ²⁶Irasirigu yu gapu, ūma birarîmasû îgû noô gâamerô ūmagû irirosû iribe. Yu gâamerô irimoâmabea. Marîpuyare masîsîa, îgû gâamerîrê irigu yâa. ²⁷Irasirigu yu iriduarire, yu uaribejarire iribe. Yu iriduarire irimakû, gajerârê Marîpuyare buedi âârîkererepuru, Marîpu yure: “Ôârô iribu”, ârîbiribokumi.

Keori weadeare buremubirikōāka!
ārī gojadea

10 ¹Yaara, musārē irire masīmakū ñekūsamarā merā āārīdi āārīmī ĩgūsārē Egiptogue āārīrārē āi wiugu. ĩgū iriudea mikāyēbo merā ĩgūsārē dupuyudi āārīmī. Āārīpererā ĩgūrē tuyarā, dia wādiya, deko diiadiya wāikūdiya dekogue, bojori maā ĩgū iridea maague taribujanerā āārīmā. ²ĩgūsā Moisés merā mikāyēbo doka, dia wādiyare taribujanerā āārīmā. Iro taribujarā, āārīpererā ĩgū merā wādiya dekogue wāiyesūrā irirosū waanerā āārīmā. Iri merā ĩgūyarā āārīrīrē ĩmunerā āārīmā. ³ĩgūsā āārīpererā Marīpu sīdea ũmugasima baarire baanerā āārīmā. ⁴Āārīpererā Marīpu ũtāyegue deko wiridoredeare iirīnerā āārīmā. Cristo iri ũtāye irirosū āārīdi āārīmī. ĩgūta okari sīdi āārīmī. Irasirigu ĩgūta ĩgūsārē wapikūwāgādi āārīmī. ⁵Marīpu ĩgūsārē ōārō iritamukerepuru, wārā ĩgū dorerire tarinugānerā āārīmā. ĩgūsā irasirimakū ĩāgū, Marīpu ĩgūsārē ĩasuyubiridi āārīmī. Irasirigu ĩgūsārē masaka marīrōgue boamakū iridi āārīmī ĩgū dorerire tarinugādea waja. ⁶Āārīpereri ĩgūsārē waadea kere, marīrē ĩgūsā iriderosū ñerīrē iribirikōāburo, ārī keori pídea āārā. ⁷Irasirirā, keori weadeare surāyeri ĩgūsā buremuderōsū buremubirikōāka! Keori weadeare ĩgūsā buremudeare Marīpuya wenenīrī gojadea pūgue āsū ārī gojasūdero āārībū: “Masaka baa, iirī odo, bosenu irinugānerā āārīmā”, ārī gojasūdero āārībū. ⁸Puru surāyeri ũma nomerē ñerō iri gāmebiranerā āārīmā. ĩgūsā iriderosū iribirikōārō gāamea marīrē. ĩgūsā ñerō iriri waja, sunurē veintitrés mil masaka boanerā āārīmā. ⁹Gajipoe gajerā: “Marīpu guare ōārō korebemi”, ārī werewuanerā āārīmā. ĩgūsā āriderosū ārībirikōārō gāamea marīrē. ĩgūsā ñerō wenenīrī waja ĩgūsārē āña kūrī wejēnerā āārīmā. ¹⁰Gajipoe gajerā ĩgūsā Marīpu irideare ñerō ārī

werewuamakū, Marīpure wereboegu ĩgūsārē wejēdi āārīmī. ĩgūsā āriderosū ārībirikōārō gāamea marīrē.

¹¹Marīrē inu marārē i ũma pereburo mērōgā duyawāgāriro yoa. Irasirigu Marīpu ĩgūya wenenīrī gojadea pūgue gwa ñekūsamarārē ĩgū wajamoādeare gojadoredi āārīmī, ĩgūsā iriderosū ñerō iribirikōāburo, ārīgū. ¹²Sugu: “Yu tamerā Marīpure ōārō buremusiā, ñerō iribirikoa”, ārī gūñagūno, ōārō pēmasika, iripoeque marā iriderosū ñerīrē iriri, ārīgū! ¹³Gajipoe marī āārīpererā sugu duyaro marīrō ñerīrē iriduarā, wātī ñerī ārimesāsūrā, ñerō tarirā āārā. Irasū āārīkererepu, Marīpu gapu ĩgū āriderosūta marīrē iritamunīkōāmi ñerīrē tarinugāburo, ārīgū. Marī ñerīrē tarinugānemomasibirimakū ĩāgū, gaji ñerīrē tau kāmūtāgukumi marīrē poyanorērī, ārīgū. Irasirigu marīrē ĩgū merā gūñaturamakū irīgukumi ñerīrē iribirikōāburo, ārīgū.

¹⁴Yaara yu maīrā, yure péka! Neō keori weadeare buremubirikōāka! ¹⁵Musā ōārō pēmasirā āārīmakū, irire musārē werea. Irasirirā yu ārīrīrē: “Diayeta āārā”, ārī masīa. ¹⁶Marī nerē bokatīrīrā Marīpure: “Ōāa”, ārī, usuyari sī odo, igui deko iirīripare iirīa. Irasū iirīrā: “Cristo boagu, marī ñerī iridea wajare ĩgū dí béodea merā wajaribosadi āārīmī”, ārī ĩmua. Pārūrē marī dukawa baarā: “Cristo ĩgūya dupu curusague boadea merā marīrē ĩgūyarā āārīmakū iridi āārīmī”, ārī ĩmua. ¹⁷Marī wārā āārīkererā, suru pārūrē dukawa baarā, āārīpererā marī Cristoyarā su duputa irirosū āārā. Irasirirā suguyarāta āārā.

¹⁸Guayarā Israel marā Moisés dorederosūta iririre gūñaka! Marīpure buremurā, ĩgūya wiigue waibure āia wejē soema. Wejē soe odo, Marīpu ĩūrō díre baama. Irasū baarā: “Marīpuyarā āārā”, ārī ĩmuma. ¹⁹Yu ire irasū ārīgū: “Keori weadea wajakwa, irasiriro iri keori weadea puro waibu dí pídea, gaji waibu dí nemorō āārā”, ārīgū meta yāa. ²⁰Āsū gapu ārī werea. Marīpure masīmerā, keori weadea puro waibu

dií pírá, Marípure buremubema. Wátëa gapure buremurá yáma. Ígüsá irasü buremumakü, Ígüsá buremurí wiigue musá Ígüsá merá baarâ: “Wâtëayarâ äärâ”, äri Ímurá irirosü yáa. Musá irasirimakü, neó gäämebea. ²¹Marí Opü Jesucristoyarâ äärísîá, Ígürë buremurá nerë bokatírîrâ, igui deko iiríripare iirí, párrürë dukawa baáa. Gajerâ Ígüsá keori weadeare buremurá iiríri, waibu dií Ígüsá baari, wátëaya äärâ. Irasirirâ marí Opü Jesúyare baarâ, wátëayare baamasíbea. Irasüta wátëayare baarâ, Jesúyare baamasíbea.

²²Marí Opü Ígüyarârë Ígü direta buremumakü gäämemi. Irasirirâ marí wâtëärë buremurá, marí Ígürë guamakü iribokoa. Ígü guamakü, marí Ígürë tarinugâmasíbirikoa. Marírë wajamoäburire kâmutamasíbirikoa.

Marípu gäämerí direta irika! äri gojadea

²³Masaka suräyeri äsü äri wereníma: “Marí iriduare noó gäämerö irimasîa”, äri wereníma. Ígüsá irire irasü ärikerepuru, äärípereri marí iriduare irirâ, gajerârë iritamurá meta yáa. Noó marí gäämerö irirâ, gajerârë Marípure buremunemomakü iribiribokoa.

²⁴Maríya ääríburi direta güñabiriköärö gäämea. Gajeräya ääríburidere güñarö gäämea.

²⁵Irasirirâ baari duarogue baarire wajarirâ, noó gäämerö wajari baaka! “Í baari keori weadea püroge pídea äärírî?” äri sërëñabiriköäka: “Irire baarâ, ñerö irirâ yáa”, äri güñarí, ärirâ! ²⁶Marípuya werenírí gojadea püge äsü äri gojasüdero ääríbu: “Äärípereri i ümuma, marí Opüya äärâ”, äri gojasüdero ääríbu. Irasirirâ äärípereri Ígü baari pídeare baamasîa.

²⁷Jesúre buremubi musârë baadoregu siuumakü, waaduarâ waaka! Baarâ waarâ, musârë Ígü ejorire baaka! “Í baari, keori weadea püroge pídea äärírî?” äri sërëñabiriköäka: “Irire baarâ, ñerö irirâ yáa”, äri güñarí, ärirâ! ²⁸Gajigu iro ääríÍgü äsü äribokumi

musârë: “Í baari, keori weadea püroge pídea dií äärâ”, äribokumi. Ígü irasü ärimakü, iri diire baabiriköäka! Ígü, musá baamakü: “Ñerírë irirâ yáa”, äri güñabokumi. Ígü irasü äri güñabiriköäburo, ärirâ, irire baabiriköäka! ²⁹Yu irire äríÍgü, Ígü güñarírë wereníÍgü yáa. Musá güñarírë wereníbea.

Musá gapu äsü äri sërëñabokoa yure: “ÍNasirirâ, gajigu diaye güñabiri waja, gua iriduare gorawayübokuri? ³⁰Gua baarire Marípure: ‘Ööa’, äri, usuyari símakü, gajigu gua baarire werewuamasíbemi”, äribokoa musá yure. ³¹Yu gapu äsü äri werea musârë. Musá baa, iirírá, gajinorë irirâde, Marípu gäämerí direta irika, gajerâde Ígürë: “Öätarígu äärími”, äri buremuburo, ärirâ! ³²Neó musá iriri merá judío masakare, judío masaka äärímerârë, Marípyarâdere ñerö irimakü iribiriköäka! ³³Yu irirosü irika! Äärípereri yu iriri merá masaka äärípererârë öärö iriduáa. Irasirigu öärö yu ääríburi direta güñabea. Gajeräya ääríburi gapure öärö güñáa, Ígüsáde Jesucristore buremuburo, äríÍgü. Ígürë buremumakü, Ígüsârë taugukumi, peamege waabiriköäburo, äríÍgü.

11 ¹Irasirirâ yu Cristore irituyarösüta musáde yure irituyaka!

Jesúre buremurá nerëröge nome irimaré gojadea

²Yaarâ, yure musá güñamakü, äärípereri yu buedeare keori irimakü Íägü, musârë: “Öärö yáa”, äri, usuyari merá werea. ³Gaji musârë masímakü gäämea. Cristo, äärípererâ üma dipuru äärími. Ümüu, marápore igo dipuru äärími. Marípu, Cristo dipuru äärími. ⁴Musá Marípure buremurá nerëmakü, sugu Marípure sërëgü, Marípu Ígürë weredoredeare weregu, Ígüya dipurure buuabirikumi. Ígüya dipurure buuagu, guyasürö irigu iribokumi. Cristore Ígü Opure gopeyari merá buremubirikumi.

⁵Nomeo gapu Marĩpure sērēgō, Marĩpu igore weredoredeare werego, igoya dipurure buuakumo. Igoya dipurure buuabeo, guyasĩūrō irigo iribokumo. Marĩpure igo dipurure goepeyari merā buremubiribokumo. Poari pera wuuabéodeo irirosū āārĩbokumo. ⁶Igoya dipurure buuaduabirimakū, diayeta igoya poarire pera wuuabéokōārō gāāmea. Igoya poarire pera wuuabéoduabeo: “Guyasĩūgorāa”, ārĩgō, igoya dipurure buuaburo. ⁷Ūmūu gapu Marĩpu irirosū opu āārĩsīā, ĩgūya dipurure buuabirikōāburo, Marĩpu yu Opu āārĩmi, ārĩ ĩmubu. Nomeo gapu igoya dipurure buuaburo, ūmūu yu opu āārĩmi, ārĩ ĩmubo. ⁸Neōgoraguere Marĩpu ūmūurē irigu, nomeōya gōā merā iribiridi āārĩmĩ. Nomeo gapure ūmūuya gōā merā iridi āārĩmĩ. ⁹Irasirigu ūmūurē irigu, nomeōrē iritamubure iribiridi āārĩmĩ. Nomeo gapure, ūmūurē iritamubore iridi āārĩmĩ. ¹⁰Irasirirā musā Marĩpure buremurā nerērōguere, nome ĩgūsāya dipure buuaro gāāmea. Irasū buuārā, ūmūu dorerire oārō yujurire ĩmurākuma. ĩgūsā irasiririre Marĩpure wereboerā ĩārākuma. ¹¹Irasū āārĩkererupu, marĩ Jesucristore buremurā gāme iritamua. Ūma, nome iritamurĩ marĩrō āārĩmasĩbirikuma. Nomeo ūma iritamurĩ marĩrō āārĩmasĩbirikuma. ¹²Diayeta āārā. Marĩpu nomeōrē ūmūuya gōā merā iridi āārĩmĩ. Ide diayeta āārā. Ūma, nome merā deyoama. Irasirirā āārĩpererā masaka: ūma, nomeo Marĩpu irinerā āārĩma.

¹³I āārĩpereri diayeta āārĩmakū, ĩmusā basi naásū gūñarĩ? Musā Marĩpure buremurā nerērōgue, nomeo igoya dipurure buuabeota, Marĩpure sērēmakū ĩōārĩ, o oāberi? ¹⁴Ūmūu poañapu ūmamakū guyasĩūgorāa. Āārĩpererā masaka irire masĩma. ¹⁵Nomeo poañapu ūmagō āārĩmakū: “Ōāgorāa”, ārā. Igo poañapu ūmamakū, igoya dipuru buuaro irirosū āārā. ¹⁶Yu werenĩrĩrē: “Irasū āārĩbea”, ārĩ guaseodugunorē āsū ārĩ weregura. Marĩ

Jesure buremurā, gajerā Marĩpuyarāde irire irasū dita yāa.

Marĩ Opu Jesucristo boadeare gūñarā, ĩgū nerē baadorederosū keoro iribiridea

¹⁷Dapora musārē gaji gojāa. Irire gojagu, yu musārē: “Ōārō irirā yāa”, ārĩbea. Musā nererā, oārō iriboanerā, ubu gapu poyanorēayuro. ¹⁸Irasirigu āsū ārĩ wererurorigura musārē. Musā nererā, gāme guaseo dukawariayuro. Gajerā yure irire weremakū pégu: “Diayeta āārĩkoa”, ārĩ gūñāa. ¹⁹Musā gāme dukawarirā, āsū ārĩ gūñākoa: “Marĩrē gāme dukawariro gāāmea. Irasirirā, ĩnoā gapu Jesucristoyarāgora āārĩrĩ? ārĩ masĩrākoa”, ārĩkoa. ²⁰Irasirirā musā gāme dukawariri waja, musā marĩ Opu Jesucristo boadeare nerē gūñarā, ĩgū buerā merā baatūnugū dorederosū keoro irĩ, baabea. ²¹Musā nerē baarā, surāyeri noo gāāmerō baarurorikōāa. Gajerā uaboama. Gajerā mejāma. ²²Musā noo gāāmerō iirĩ, baaduarā, ĩnasirirā musāya wiirigue baa, iiriberi? Musā Marĩpuyarā āārĩkererā, noo gāāmerō baa, iirirā, musā nererĩrē wajamarĩrōsū irirā yāa. Musā watopegue āārĩrā baari opamerārē guyasĩūrō tarimakū irirā yāa. Musā irasiriri kerere pégu, ĩnaásū ārĩ weregukuri yu musārē? “Ōārō irirā yāa”, ārĩbirikoa.

Marĩ Opu Jesucristo ĩgū buerā merā baatūnudeare gojadea

²³⁻²⁴Marĩ Opu Jesucristo yure buedeare yu musārē werebu. Iri āsū āārā. ĩgūrē wējēduarāguere ĩgūrē Judas ĩmuburi dupuyuroma ñamita marĩ Opu Jesucristo pārūrē āĩ, Marĩpure: “Murē usuyari sĩa”, ārĩ, irirure pea, ĩgū buerārē: “I yaa dupu āārā”, ārĩ gueredi āārĩmĩ. “Irasirirā yu musā merā dapora iriaderosū nerē, pārūrē baariku, yu musārē boabosarire gūñāka!” ārĩdi āārĩmĩ. ²⁵ĩgūsā baa odoadero puru, pārūrē āiderosũta iirĩrĩpare āĩ, āsū ārĩdi āārĩmĩ: “Yu musārē boabosagu yaa dí béori merā Yu pu musārē: ‘Ōārō irigura’,

ārīdeare iriyuwarikugukumi. Irasirirā musā nerē, iirīripare iirīriku, yū dī béobosarire gūñaka! ārīdī āārīmī. ²⁶ Īgū āārīderosūta irirā, marī nerērā, pārūrē baarīku, iirīripare iirīriku: “Marī Opū Jesucristo marīrē boabosadi āārīmī”, ārī īmurākoa. Irire irinīkōārō gāāmea. Īgū i ūmūgue dupaturi aarimakū, irire irinemobirīkoa.

Marī Opū Jesucristo boadeare gūñarā, āsū iridorea, ārī gojadea

²⁷ Marī Opū Jesucristo boadeare marī nerē gūñaripoe Marīpūre būremurī marīrō merā pārūrē baa, iirīripare iirīgūno ñerō irigu yāmi. Jesucristo marīrē boabosagu dī béodeare ubu āārīrī irirosū gūñā. ²⁸ Irasirirā pārūrē baa, iirīripare iirīburi dupuyuro masakakū marī irideare: “Ñerō irikubū”, ārī gūñapūroriro gāāmea. ²⁹ Marī Opū Jesucristoya dupū āārīrīrē pémasirō marīrō merā pārūrē baa, iirīripare iirīmakū, Marīpū marīrē wajamoāgukumi. ³⁰ Musā irire pémasībirīdea waja wārā musā merāmarā pūrīrikurā, turamerā āārīma. Surāyeri boakōāsīama. ³¹ Marī baa, iirīburi dupuyuro marī irideare: “Ñerō irikubū”, ārī gūñapūrorimakū, marī Opū marīrē wajamoābirīkumi. ³² Marī Opū gapū marīrē īgūyarārē marī ñerī iririre piriburo, ārīgū, wajamoāmi. Irasirigu īgūrē būremumerārē peamegue waadore, marī gapūre īgūsā merā wajamoābirīkumi.

³³ Irasirirā yaarā, musā nerē baarā, suro merā baamurā gajerādere yūka! ³⁴ Ūboagūno īgūya wīgūe baaburo. Irasirimakū, musā ōārō nerē baamakū, Marīpū musārē wajamoābirīkumi. Gajire musā pūroque waagū, ōārō were āmugura.

Ōāgū deyomarīgū Marīpūyare marīrē irimasīmakū iririre gojadea

12 ¹ Yaarā, Ōāgū deyomarīgū Marīpūyare marīrē irimasīmakū irigu āārīmi. Yū irire musārē ōārō masīmakū gāāmea.

² Musā ire ōārō masīsīāa. Jesucristore būremuburi dupuyuro keori weadeare būremutuyanērā āārībū. Iri keori weadea okari opabea. Neō werenībea. ³ Irasirigu daporare yū musārē ire masīmakū gāāmea. Neō sugū Ōāgū deyomarīgū iritamurī merā weregu: “Jesūre ñerō waanaburo”, ārīmasībirīkumi. Gajigu Ōāgū deyomarīgū iritamurī marīrō merā weregu: “Jesús marī Opū āārīmi”, neō ārīmasībirīkumi.

⁴ Ōāgū deyomarīgū Marīpūyare marīrē irimasīmakū iriri, wārī āārā. Īgū suguta irire sigū āārīmi. ⁵ Marī Opū Jesucristo marīrē moādoreri, wārī āārā. Īgū suguta irire moādoregu āārīmi. ⁶ Marīpūyare iriri, surosū āārībea. Marīpū suguta marī āārīpererārē īgūyare ōārō irimasīmakū irigu āārīmi. ⁷ Marīpū Ōāgū deyomarīgūrē marī masakakure sīrī merā īgū marī merā āārīrīrē īmumi, āārīpererā Jesucristore būremurārē gāme iritamuburo, ārīgū.

⁸ Ōāgū deyomarīgū surāyerire ōārō masīrī merā Marīpūyare weremakū yāmi. Gajerādere ōārō pémasīrī merā īgūyare weremakū yāmi. ⁹ Gajerārē: “Marīpū iritamurī merā marī ōārō irimasīa”, ārī būremumakū yāmi. Irasū āārīmakū, gajerārē īgū turarire sīmi pūrīrikurārē tauburo, ārīgū. ¹⁰ Gajerārē īgū turari merā iri īmurīrē irimasīmakū yāmi. Gajerārē Marīpū īgūsārē werederire ōārō weremasīmakū yāmi. Gajerārē: “Wātī turari merā, o Ōāgū deyomarīgū turari merā āsū yāmi ī”, ārī masīrīrē sīmi. Gajerārē gajī masā ya werenīrī merā īgūsā dupuyurogue werenīmasībirīdeare werenīmasīmakū yāmi. Gajerārē, iri werenīrīrē masībirīkererā, Ōāgū deyomarīgū iritamurī merā: “Āsū ārīduaro yāa ī”, ārī masīmakū yāmi. ¹¹ Ōāgū deyomarīgū marī masakakure gajerosūperi dita īgū sīduarire sīmi. Īgū suguta Marīpūyare marī irimasīburire sigū āārīmi.

Marī Cristoyarā āārīrā su dupūta irirosū āārā, ārī gojadea

¹² Marīya dupūma wārī āārā. Wārī āārīkerero, su dupūta āārā. Cristode

irasûta âârimî. Marî îgûrê buremurâ wârâ âârikererâ, su dupûta irirosû âârâ. ¹³Murârôta marî îgûrê buremurâ ââripererâ: judîo masaka, judîo masaka âârimêrâ, gajerârê moâboerâ, moâboemerâde wârâ âârikererâ, Ôâgû deyomarîgû sugu merâta wâiyesûbu. Irasirîgu marîrê su dupûta irirosû âârimakû yâmi. Irasirirâ marî ââripererâ Ôâgû deyomarîgûrê opâa.

¹⁴Marîya dupûma ââriîrî su wâita ââribea. Wârî âârikôâa. ¹⁵Marîya gubu werenîrî gubu ââriîrî âsû âribokoa: “Mojô ââribea. Irasirîro mûya dupûma ââribea”, âribokoa. Marîya gubu irasû ârikerero, marîya dupûmata âârâ. ¹⁶Marîya gâmpîw werenîrî gâmpîw ââriîrî âsû âribokoa: “Koyeru ââribea. Irasirîro mûya dupûma ââribea”, âribokoa. Marîya gâmpîw irasû ârikerero, marîya dupûmata âârâ. ¹⁷Marîya dupû, koyeru dita âârimakû, çnasirisîâ, pébokuri marî? Marîya dupû, gâmpîw dita âârimakû, çnasirisîâ, gajinorê wîjîbokuri marî? ¹⁸Marîpû marîya dupure irîgu, ââripereri îgû gââmerôsûta keoro iridi âârimî. ¹⁹Ââripereri marîya dupûgue ââriîrîno su wâita âârimakû, marîya dupû marîbokuyo. ²⁰Âsû âârâ. Marîya dupûgue ââriîrî wârî âârikererû, su dupûta âârâ. I irirosûta marî Jesûre buremurâ wârâ âârikererâ, su dupûta irirosû âârâ.

²¹Irasirîro koyeru, mojrê: “Murê gââmebea”, ârimasîbirikoa. Dipuru, guburire: “Murê gââmebea”, ârimasîbirikoa. ²²Âsû gapû âârâ. Gaji marîya dupûgue ââriîrî, turabiri âârikererû, marî gapû irire burô gââmea. ²³Gaji marîya dupûgue ââriîrîrê: “Ubu ââriîrî âârâ”, âri gûnâa. Irasirirâ irire ôârô deyoburo, âriîrâ, ôârô âmua. Gaji marî guyasîrîsîrîrê surî sâna kâmutâa masaka îâbirikôâburo, âriîrâ. ²⁴Gaji marîya dupûgue ââriîrîrê ôârî deyori gapure âmubea. Marîpû marîya dupûgue ââriîrîrê ââripererire ôârô âmudi âârimî, su dupûta ôârô dupûkuburo, âriîgû. Irasirîgu: “Ubu ââriîrî âârâ”, marî âriîrî gapure ôârô

gââmemakû yâmi. Irasirirâ marî neô gajîgu Jesûyagure: “Ubu ââriîgû âârimî, irasirirâ îgûrê gââmebea”, âribirikôârô gââmea. ²⁵Âsûta ââriîdoredê âârimî, Marîpû marîya dupû suro merâ iritamuburo, âriîgû. ²⁶Marîya dupûgue ââriîrî su wâi ñerô tarimakû, gajide ââripereri ñerô taria. Su wâirê ôârô âmumakû: “Marîya dupû ââriperero ôârô âârâ”, âri gûnâa.

²⁷Yu irire âriîgû, âsû âriîduagu yâa. Marî Cristore buremurâ îgûya dupû irirosû âârâ. Irasirirâ marî masakaku îgûya dupûgue ââriîrî irirosû âârâ. ²⁸Irasirîgu Marîpû marî Jesûre buremurârê gâme iritamuburire pígu, âsû pídi âârimî. Jesucristo buedoregu pínerârê pípuroridi âârimî. Pûru Marîpû gajerârê îgû weredorosû weremurârê pídi âârimî. Pûru gajerârê îgûyare buemurârê pídi âârimî. Gajerârê îgû turaro merâ iri îmumurârê, gajerârê pûrîrikûrârê taumurârê, gajerârê masakare iritamumurârê, gajerârê dorerimasâ âârimurârê, gajerârê gaji masâ ya merâ îgûsâ dupuyurogue neô werenîmasîbirideare werenîmasîmurârê pídi âârimî. ²⁹Irasirîgu marî ââripererârê srosû irimurârê píbiridi âârimî. Irasirirâ marî ââripererâ Jesucristo buedoregu pínerâ meta âârâ. Marî ââripererâ Marîpû weredorosû wererâ meta âârâ. Marî ââripererâ Marîpûyare buerâ meta âârâ. Marî ââripererâ Marîpû turaro merâ iri îmumurâ meta âârâ. ³⁰Marî ââripererâ pûrîrikûrârê taumasîrâ meta âârâ. Marî ââripererâ gaji masâ ya werenîrî merâ werenîmasîrâ meta âârâ. Marî ââripererâ îgûsâ werenîrîrê péadero pûru: “Âsû âriîduaro yâa”, âri wererâ meta âârâ. ³¹Irasirirâ Ôâgû deyomarîgû Marîpûyare irimasîrî sîrîrê gââmeka musâ! Yu musârê i ââripereri nemorô ôârîrê weregura.

Gâme maîrîmarê gojadea

13 ¹Marî gaji masâ ya werenîrîrê werenîmasîkererâ, Marîpûre wereboerâ ya werenîrîrê

werenímasikererá, gajerārē maĩbirimakū, marĩ werenírĩ wajamarĩbokoa. Kōme majĩ pábiramakū busurosū marĩ werenírĩ busukōábokoa. ²Marĩpũ marĩrē weredorerosū ōārō weremasikererā, gajerārē maĩbirimakū, marĩ wererĩ wajamarĩbokoa. Āārĩpererire masikererā, Marĩpũyare masaka dupuyurogue masĩbirideare āārĩpererire pēmasikererā, gajerārē maĩbirimakū, marĩ masĩrĩ wajamarĩbokoa. Marĩpũre bũremurĩ marĩrē ĩgũ sirĩ merā buũrue gajerogũ waadoremāsikererā, gajerārē maĩbirimakū, marĩ bũremurĩ merā iriri wajamarĩbokoa. ³Marĩ oparĩ āārĩpererĩ boporārē sikererā, ĩgũsārē maĩbirimakū, marĩ iriri wajamarĩbokoa. Marĩpũyare marĩ irideare waja marĩya dupũre masaka soekerepũrũ, marĩ gajerārē maĩbirimakū, Marĩpũ marĩrē: “Ōārō iribũ”, ārĩbiribokumi.

⁴Marĩ gajerārē maĩrā, mata ĩgũsā merā guaña máa. ĩgũsārē boponarĩ merā ōārō yáa. ĩgũsārē ĩaturĩña máa. “ĩgũsā nemorō ōāgũ āārā”, ārĩmasĩña máa. “ĩgũsā nemorō masĩtarĩnũgāgũ āārā”, ārĩmasĩña máa. ⁵Marĩ gajerārē maĩrā, ĩgũsārē bũremurĩ merā keoro werea. Marĩya āārĩburĩ direta gũñabea. ĩgũsāya āārĩburidere gũñáa. ĩgũsārē guarĩ merā wereña máa. ĩgũsā marĩrē ñerō irimakū, yoaripoe ĩgũsā merā guanĩña máa. ⁶Gajerārē maĩrā, ĩgũsā ñerō irimakū ĩārā, usuyamasĩña máa. Diayema gapũre ĩgũsā irimakū ĩārā, usuyáa. ⁷Marĩ gajerārē maĩrā, ĩgũsā ñerō irimakū ĩārā, masakare neō kere werebea. Gajerā ĩgũsārē werewuakerepũrũ, marĩ ĩgũsārē bũremurĩrē neō pirĩbirikoa. “Pũrugue ĩgũsāde ōārĩ gapũre irirākuma”, ārĩ gũñáa. ĩgũsā iriri merā marĩ ñerō tarikererā, ĩgũsārē maĩsĩā, neō pirĩbea.

⁸Marĩ gāme maĩrĩ neō perebirikoa. Marĩpũ weredorerosū wererĩ gapũ pererokoa. Gaji masā ya merā marĩ werenĩrĩde pererokoa. Marĩpũyare masĩrĩ merā ōārō wereride, pũrugue pererokoa. Iri irasũ waamakū, marĩ masĩdero nemorō āārĩpererire masĩrākoa.

⁹Daporare marĩ āārĩpererĩ Marĩpũyare

masĩbea. ĩgũ weredorerosũta ĩgũ masĩrĩ sirĩ merā werekererā, āārĩpererĩ ĩgũyare weremasĩbea. ¹⁰Pũrugue Jesucristo Marĩpũyare masĩpeogũ aarimakū, marĩ masĩbirideare masĩpeorākoa.

¹¹Yu majĩgũ āārĩgũ, majĩrā irirosũ gũñarĩ marĩrō werenĩ, ĩgũsā irirosũta iriunabu. Yu buũro waagũ, majĩrā irirosũ āārĩdeare pirikōābu. ¹²Daporare Marĩpũyare marĩ ōārō masĩbea. Diuru buũru merā marĩ āĩñamakū ōārō deyomarĩrō irirosũ āārā. Ōārō deyobebe. Pũru ōārō deyorogũ Marĩpũre ĩārākoa. Daporare marĩ ĩgũrē sirũgā masĩā. Pũru Marĩpũ marĩrē masĩpeorosũta marĩde masĩpeorākoa.

¹³Daporare ure wāĩ āārā: Marĩpũre bũremurĩ, ĩgũ merā ōārō irigukumi, ārĩ usuyarĩ, marĩ gāme maĩrĩ āārā. Iri ure wāĩ neō perebirikoa. Gāme maĩrĩ gapũ gajĩ nemorō ōārĩ āārā.

Gaji masā ya werenírĩ merā marĩ werenĩmasĩbirikererā werenĩrĩmarē gojadea

14 ¹Gajerārē maĩnemoka! Irasũ āārĩmakū, Marĩpũyare Ōāgũ deyomarĩgũ musārē irimasĩrĩ sirĩrē gāameka! Āārĩpererĩ ĩgũ irimasĩrĩ sirĩrē gũñarā, gajĩ nemorō Marĩpũ weredorerosũ werenimasĩrĩ gapũre buro gāameka! ²Sugũ gajĩ masā ya werenĩrĩ merā werenĩmasĩbirikeregũ werenĩmakū, Marĩpũ dita ĩgũ werenĩrĩrē pēmi. Masaka gapũ ĩgũ werenĩrĩrē pēbema. Ōāgũ deyomarĩgũ turarĩ merā Marĩpũyare masĩña marĩdeare werenĩmi. ³Marĩpũ weredorerosũ weregũ gapũ masakare weremĩ. ĩgũ wererĩ pērārē Jesucristore bũremunemomakū yāmi. ĩgũ wererĩ merā ĩgũsārē ōārō āārĩrikumakū, ōārō yũjũpũrākumakū yāmi. ⁴Gaji masā ya werenĩrĩ merā werenĩmasĩbirikeregũ werenĩgũ ĩgũ basi Jesucristore bũremunemogũ yāmi. Marĩpũ weredorerosũ weregũ gapũ gajerā Jesucristore bũremurārē ĩgũrē bũremunemomakū irigũ yāmi.

⁵Gaji masā ya werenĩrĩ merā musā werenĩmasĩbirideare āārĩpererā musā

werenímasímakū gāamea yu. Iri nemorō Marīpu weredorerosū musā weremakū buro gāamea. Marīpu weredorerosū weregu gapu, gaji masā ya werenírí merā werenígū nemorō masakare iritamugū āārími. Irasū āāríkerepuru, gaji masā ya werenírírē pégu: “Āsū ārīduaro yāa”, āri weremakū ōāgorāa. Īgū irasū āri weregu, Jesucristore būremurārē ĩgūrē būremunemomakū irigu yāmi. ⁶Yaarā, yu musā puoguo waagū, gaji masā ya werenírí merā werenígū, musārē iritamubiribokoa. Marīpu ĩgūyare yure masímakū irideare weregu, ĩgūya diayema kerere masírí merā weregu, ĩgū yure weredorerire weregu, ĩgūyare musārē buegu, musārē iritamubokoa.

⁷Keorí merā musārē weregura. Tērēdirure keoro puribirimakū, o arpa wāikuro buaputērōde keoro buaputēbirimakū, iri wāi bayari āāríkkoa, ārīmasíña máa. ⁸Surara gāmewējērā waaburi dupuyuro sugu ĩgūsā merāmu puridirure keoro puribirimakū, gajerā surara ĩgūsā mojúkuburire āmubirikuma. ⁹Musāde irasūta āārā. Musā gaji masā ya werenírí merā werenímakū pérā: “Āsū ārírā irikuma ĩgūsā”, ārīmasíbirikuma. Irasírírā musā ubogorata werenímoāmakōārā irikoa. ¹⁰I ūmguere wāri buri marā āāríma. Īgūsā basi ĩgūsā werenírírē pémasíma. ¹¹Yu gaji masā ya werenírí merā werenígūrē pébi: “Gajeromu āārími”, āri gūñagukoa. Īgūde yu gaji masā ya werenírí merā werenímakū pébi yure: “Gajeromu āārími”, āri gūñagukumi. ¹²Irasūta āārā musādere. Musā Ōāgū deyomarīgū turaro merā irimasírí sírírē gāamea. Irasírírā gajerā Jesucristore būremurārē ĩgūrē būremunemomakū irimasírírē buro gāameka! ¹³Irasirigu sugu gaji masā ya werenírí merā werenímasíbirikeregu werenígūno Marīpūre: “Yu werenírírē gajerārē: ‘Āsū ārīduaro yāa’, āri weremakū iritamuka yure!” āri sērēburo. ¹⁴Yu gaji masā ya werenírí merā werenímasíbirikeregu werenírí merā Marīpūre sērēgū, Ōāgū

deyomarīgū gūñarí sírí merā sērēa. Irasū sērēkeregu, gūñarí merā yu sērēadeare: “Āsū ārīduaro irikoa”, āri pémasíbirikoa. ¹⁵Irasírírā āsū iriro gāamea. Ōāgū deyomarīgū turari merā gaji masā ya werenírí merā Marīpūre sērērō gāamea. Irasū āārímakū, pémasírí merā marí ya werenírí merā Marīpūre sērērō gāamea. Ōāgū deyomarīgū turari merā gaji masā ya werenírí merā Marīpūre bayapeoro gāamea. Irasū āārímakū, pémasírí merā marí ya werenírí merā Marīpūre bayapeoro gāamea. ¹⁶Marí Ōāgū deyomarīgū turari merā gaji masā ya werenírí merā Marīpūre usuyari sikerepuru, marí merā āārírā pébiribokuma. Īgūsā irire pémerā: “Irasūta āārā”, āri, marí merā Marīpūre usuyari sibiribokuma. ¹⁷Marí gaji masā ya werenírí merā Marīpūre usuyari sírí ōāgorāa. Irasū āāríkerepuru, marí merā āārírā gapu marí werenírírē pébirimakū, marí ĩgūsārē Jesucristore būremunemomakū iribirikoa. ¹⁸Gaji masā ya werenírí merā werenímasíbirikeregu werenírírē yuta musā āārípererā nemorō werenía. Irire irisíā, Marīpūre usuyari síā. ¹⁹Irasū āāríkeregu, Jesúre būremurā nerērogue gaji masā ya werenírí merā wāri musā pébirire yu weremakū musārē ōābirikoa. Musā pémasírírē yu mérīgā weremakū gapu, musārē ōārokkoa.

²⁰Yaarā, majírā pémasímerā irirosū gūñabirikōāka! Murā irirosū ōārō pémasírí merā gūñaka! Nerō iriri gapure majírāgā gūñamerā irirosū āāríkka! ²¹Marīpūya werenírí gojadesa pūgue āsū āri gojasūdero āārīb: “Marí Opū āsū ārīmi: ‘Gajero marārē ĩgūsā ya werenírí merā i makā marārē weredoregura. Yaare ĩgūsārē irasū weredorekerepuru, i makā marā yure neō būremubirikuma’, ārīmi marí Opū”, āri gojasūdero āārīb. ²²Irasirigu Marīpū gajero marārē ĩgūsā ya werenírí merā ĩgūrē būremurārē weredoregu, ĩgūsā ĩgūrē būremubirire ĩmumi. ĩgūrē būremurā gapure irasiribemi. ĩgūyare ĩgū weredorerosū wererā merā ĩgūsārē weremi.

²³Irasirirā musā Jesúre buremurā nerērōgue gaji masā ya werenírí merā werenímasíbirikererā werenírírē musā āārípererā wereníbokoa. Musā irasū werenímakū, Marípuayare masímerā, gajerā Jesúre buremumerāde ñajājabokuma. Musā irasū werenírírē pérā, musārē: “Niārímasā āāríma”, ārībokuma. ²⁴Musā āārípererā Marípu weredorerosū weremakū Marípuayare masíbi, Jesúre buremubide ñajāri pégu, ígū ñerō irideare masígukumi. Irasirígu ígū ñerí irideare bujaweregukumi. ²⁵Ígū gūñarígue ñerō: “Ñerírē gūñayo yu”, ārí pémasígukumi. Irasirígu ñadukupuri merā ejamejā, Marípu: “Yu Opu āārā”, ārí buremugukumi. Irasū āārímakū: “Marípu diayeta musā merā āārími”, ārí masígukumi.

**Musā nerērā, gopeyari merā
ōārō keoro irika! ārí gojadea**

²⁶Yaará, musārē āsū ārí werea. Musā nerēmakū, surāyeri Marípu bayapeoma. Gajerā Marípuayare buema. Gajerā Marípu ígūyare ígūsārē masímakū irideare werema. Gajerā gaji masā ya werenírí merā werenímasíbirikererā wereníma. Gajerā iri werenírírē: “Āsū ārídūaro yāa”, ārí werema. Irasirirā āārípereri irire musā Jesúre buremurā ōārō keoro irika, musā ígūrē buremunemobuosíta! ²⁷Irasirirā gaji masā ya werenírí merā werenímasíbirikererā werenírā, pérā, o urerā wereníburo. Sugu werení odoadero puru, gajigu wereníburo. Puru gajigu ígūsā werenírírē: “Āsū ārídūaro yāa”, ārí wereburo. ²⁸Musā nerēmakū, ígūsā werenírírē: “Āsū ārídūaro yāa”, ārí werebu marímakū, gaji masā ya merā wereníbirikōáburo. Ígūsā seyaro ígūsā gūñarígue Marípu merā wereníburo. ²⁹Marípu weredorerosū wererāde, pérā, o urerā wereburo. Irasū keoro weremakū pérā, gajerā ígūsā wererire: “Diayeta Marípuayare kereta āārā”, ārīburo. ³⁰Musā nerērōgue sugu weremakū, Marípu gajigūre irogue doagūre weredoremakū, werepuroriadi gapu toeburo. ³¹Musā

irasū irirā, musā āārípererā Marípu weredorerosū weremasírākoa. Sugu werepuroriadi were odoadero puru, gajigu werewāgānaburo. Irasirímakū, āārípererā pé, ōārō yujupūrākurākuma. ³²Marípu weredorerosū wererā musā wereburi dupuyuro: “¿Naásū āārímakū irire wererākuri?” ārí gūñapuroriro gāamea. ³³Marí nerēmakū, Marípu marírē keoro irimakū gāamemi. Noó gāamerō iriro maríro usuyari merā nerēmakū gāamemi. Āārípererogūe Jesúre buremurā nerērārē irasū dita irimakū gāamemi.

³⁴Jesúre buremurā nerēmakū, nome wereníbirikōáburo. Nomerē werenídereri máa. Werenírōnorē irirā, Marípuayare werenírí gojadea pūgue dorederosíta ōārō péro gāamea. ³⁵Jesúre buremurā nerēmakū, sugo nomeō werenígō, gūyasūrō iribokumo. Irasirigo igo gajino ōārō pébiradeare masíduago ígoya wiigue igo marāpūre sērēñaburo.

³⁶Ire musā masíka! Musā Marípuayare kerere werepurorinerā āāríbea. Irasū āārímakū, musā dita ígūyare buremurā āāríbea. Gajerāde ígūrē buremurā āāríma. ³⁷Sugu musā merāmu: “Yu Marípu weredorerosū weregu āārā”, ārí gūñagū, o gajigu: “Yu Ōāgū deyomarígū irimasírí sírírē opáa”, ārí gūñagū, i yu musārē gojarire: “Marí Opu doreri āārā”, ārí masígukumi. ³⁸Yu gojarire: “Marí Opu doreri āāríbea”, ārímakū, ígūrē: “Marípuayare weregu āāríbemi”, ārika!

³⁹Yaará, Marípu weredorerosū weremasírírē buro gāameka musā! Musā merāmarārē ígūsā gaji masā ya merā werenímasíbirikererā werenímakū: “Werenímerāta!” ārībirikōāka! ⁴⁰Musā nerērā, noó gāamerō iribirikōāka! Gopeyari merā āārípereri musā iririre ōārō keoro irika!

Cristo masādeare gojadea

15 ¹Yaará, yu musārē iripoegue weredea, Jesucristo masakare tauri kerere daporare gūñamakū gāamea. Musā irire pérā, buremubu.

Daporadere irire buremuníkôã. ²Musã iri kerere buremusiã, peamegue waamurã meta ããrã. Iri kerere musãrê yu weredeare buremurîrê piribirimakû, Marîpu musãrê taugukumi. Musã iri kerere buremubirinerã, diayeta tausûbiribokoa.

³Yure buedeare musãrê weretaubu. Iri bueri, gaji bueri nemorô ôataria. Âsû ããrã. Marîpuya wenenîrî gojadea pûgue gojaderosûta Cristo marî ñerô iridea waja marîrê boabosadi ããrimí. ⁴Îgû boadero puru, îgûrê yãnerã ããrimá. Puru Marîpuya wenenîrî gojadea pûgue gojaderosûta wrenu waarô merã Marîpu îgûrê masûdi ããrimí. ⁵Îgûrê masûdero puru, Cristo Pedrore deyoayupu. Puru îgû buedoregu pînerã, pe mojóma pere su gubu peru pêrêbejarê deyoayupu. ⁶Puru suñarô wãrã quinientos masaka nemorô îgûrê buremurãrê deyoayupu. Wãrã îgûrê iãnerã okama dapa. Gajerã boasianerã ããrimá. ⁷Puru Santiagore deyoayupu. Iro puru ããripererã îgû buedoregu pînerãrê deyoayupu.

⁸Ããripererã gajerãrê îgû deyoadero puru, yudere deyoatûnumi pama. Majîgûgã keoro deyoabigã deyoadi irirosû yu ããrikeregu, Jesúre buremutuyáa. ⁹Îgû yure deyoaburi dupuyuroge îgûrê buremurãrê ñerô irigorenabu. Irasirigu gajerã Jesús buedoregu pînerã ããripererã dokague ããrã. Masaka yure: “Îgû Jesús buedoregu pídi ããrimí”, ãrimakû: “Yu Jesús buedoregu píbodi ããribiradibu”, ãrî gûnáa. ¹⁰Irasû ããrikerepuru, Marîpu yure ôãrô iritamumi. Irasirigu Jesucristo yure îgûyare buedoregu pími. Marîpu yure ubugora ôãrô iritamugû meta yámi. Yu ããripererã gajerã Jesucristo buedoregu pînerã nemorô moãa. Yu gûñarî merã irasiribeã. Marîpu yure ôãrô iritamugû, yu merã ããriníkôãmi. Yure îgû iritamurî merã ôãrô moãmakû yámi. ¹¹Yu bueri, gajerã Jesucristo buedoregu pînerã bueri irirosûta ããrã. Gua ããripererã Jesucristo boa, masãdea kerere buea. I kerere pérã, musã îgûrê buremunûgãbu.

Boanerã masãburire gojadea

¹²Gua, Cristo boa, masãdeare buekerepuru, gajerã musã merã ããrirã: “Boanerã neô masãbirikuma”, ãrîma. ¿Nasirirã irasû ãrîri ire? ¹³Boanerã masãburi marîmakû, Cristode masãbiribodi ããrimí. ¹⁴Cristo masãbirimakû, gua bueri neô wajamaribokoa. Musã îgûrê buremurîde wajamaribokoa. ¹⁵Marîpu boanerãrê masûbi, Cristodere masûbiribodi ããrimí. Îgû irasû iribirimakû, gua: “Marîpu Cristore masûdi ããrimí”, ãrîrã, ãrîgatorã iribokuyo. ¹⁶“Boanerã masãbirikuma”, îgûsã ãrîri diaye ããrimakû, Cristode masãbiribodi ããrimí. ¹⁷Cristo masãbirimakû, îgûrê musã buremurî wajamaribokoa. Irasirirã musã ñerî iridea waja, waja opakôãbokoa dapa. ¹⁸Diayeta i irasû ããrimakû, Cristore buremurã boanerã, îgûrê buremubirinerã peamegue waamurã irirosû ããribokuma. ¹⁹Marî Cristore buremurã: “Marî okarinurî dita îgû merã ôãrô ããrirãkoa. Marî boadero puru masãburire masîña máa”, ãrî gûñarã, ããripererã masaka nemorô bopora ããribokoa.

²⁰“Cristo boadero puru, masãdi ããrimí”, ãrîrî gapu diaye ããrã. Marî ããripererã masaka boadero puru masãburi dupuyuro masãpûroridi ããrimí. ²¹Âsû ããrã. Neôgorague ããripûroridi Adán ñerî iripûrorideã waja marî masaka ããripererã boamurã dita ããrã. Puru Jesucristo ôãrîrê iripeodeã waja marî boadero puru masãrãkoa. ²²Marî masaka ããripererã Adán parãmerã ããrituriarã ããrîrî waja boamurã dita ããrã. Cristoyarã marî ããrimakû, marî boadero puru, Marîpu marî ããripererãrê masûgukumi. ²³Marîpu marîrê keoro masûgukumi. Cristo masãsiadi ããrimí. Puru îgû i ûmuge dupaturi aarimakû, marî îgûyarã ããrisîã, masãrãkoa. ²⁴Irasû waamakû, i ûmu pereakôãrokoa. Irinurê Cristo ããripererã ñerãrê: oparãrê, dorerãrê, turarãrê bêogukumi. Îgû irasiriadero puru, îgû

Pagure igũ aaripererã Opu aarirĩrẽ wiagukumi. ²⁵Igũ wiaburi dupuyuro Marĩpu Cristore iaturirã aaripererãrẽ beogukumi. Igũsarẽ beoburi dupuyuro Marĩpu gãamederosũta Cristo aaripererã Opu aarĩgukumi. ²⁶Aaripererã igũrẽ iaturirãrẽ beodero puru, boaridere peremakũ irigukumi. ²⁷Marĩpu igũya werenĩrĩ gojadea pũgue ariderosũta Cristore aaripererãrẽ doregu, aaripererire opagu aarĩmakũ iridi aarĩmĩ. Irasũ arĩro: “Marĩpu weka doregu Cristo aarĩmĩ”, arĩduaro meta yaa. Marĩputa aaripererire, aaripererãrẽ Cristo dokague pĩdi aarĩmĩ. ²⁸Marĩpu igũrẽ irasiri ododero puru, Cristo Marĩpu magũ igũ aaripererãrẽ doregu, aaripererire opagu aarĩrĩrẽ Marĩpure wiagukumi. Irasirĩgu Marĩpu aaripererĩ, aaripererã Opu aarĩgukumi.

²⁹Gaji aarã. “Boanerã masãbirikuma”, igũsã arĩkereruru, ÷nasirirã gajerã masaka boanerãya aarĩburire wãiyebosayuri? Igũsã: “Boanerã masãbirikuma”, arĩrã, igũsãya aarĩburire wãiyebosabiribokuma.

³⁰Gua: “Boanerã masãrãkuma”, arĩ bueri waja umuriku gajerã guare ñerõ iridũama. Guare igũsã ñerõ iridũakerepuru, boanerã masãburire masĩsã, irire buenĩkõaa. ³¹Yaarã, i diayeta aarã. Marĩ Opu Jesucristore musã buremumakũ iagũ, yu buru usuyaa. Ide diayeta aarã. Umuriku: “Masaka yure wejẽkõarãkuma”, arĩ pẽñaã. ³²Yu Jesucristoya kerere bueri waja Efesoguere makãnu marã yea buru guarã irirosũ aarĩrã, yure ñerõ irima. “Boanerã masãbirikuma”, igũsã arĩrĩ diaye aarĩmakũ, yu irogue bueri waja ñerõ taridea wajamarĩbokuyo. “Boanerã masãbirikuma”, igũsã arĩrĩ diaye aarĩmakũ, marĩde gajerã irirosũ aũ arĩ werenĩbokoa: “Nãka baa, iirĩrã! Ñamigã boakõabokoa. Irasirirã marĩ boaburi dupuyuro marĩ gãamerõ irirã!” arĩbokoa.

³³Gajerã arĩgatorire pẽbirikõaka! Masaka aũ arĩ werewuakuma: “Ñerãrẽ wapikurã, musã õarõ

iririkurire pirikõarãkoa”. ³⁴Irasirirã musã dupuyurogue goepeyari merã keoro iriderosũta irika doja! Ñerĩrẽ irinemobirikõaka! Musã surãyeri Marĩpure masĩbea. Musãrẽ guyasiridoregu irasũ arã.

Boanerã masãburire gojanemodea

³⁵Gajipoe sugũ aũ arĩ sereñabokumi: “÷Nasiri boanerã masãrãkuri? ÷Naasũperi dupũ oparãkuri?” arĩbokumi. ³⁶Irasũ sereñagũ pẽmasĩbi aarĩmĩ. Marĩ oteri yeri otedero puru, iri yeri puriburi dupuyuro yeba poekague boakõakoa. Boa, puru puri wirikoa. Boabirimakũ, neõ puri wirimasĩbirikoa. ³⁷Marĩ oterã, puridiguere arĩ otebea. Dupayeri direta otea. Iri yeri trigo yeri aarĩrõ, o gaji yeri aarĩrõ aarĩkoa. ³⁸Iri yerire marĩ otedero puru, Marĩpu gapu igũ gãamederosũta iri yerire purimakũ yãmi. Irasirĩgu ojoduka yerire ojodukaũ waamakũ yãmi. Trigo yerire trigo sari waamakũ yãmi. Irasũ dita yãmi Marĩpu. ³⁹Aaripererã okari oparã sũrosũ dupukurã aarĩbema. Masakaya dupũ, waimurãya dupũ irirosũ aarĩbea. Mirãya dupũ, waaiya dupũ irirosũ aarĩbea. ⁴⁰Umarõ marãya dupũ, i umu marãya dupũ irirosũ aarĩbea. Umarõ marã õarĩ dupũ opama. I umu marã, umarõ marã irirosũ aarĩbirikererã, igũsãde õarĩ dupũ opama. ⁴¹Abe umumu kũmijũrĩ merã asimi. Ñamĩmu irirosũ boyobemi. Neñukãde gajerosũperi gosema. Neñukãrẽ marĩ iãmakũ, gajerã sirũgã goserã deyoma. Gajerã buru goserã deyoma.

⁴²Marĩ boanerã masãrã aũ aarĩrãkoa. Marĩ boamakũ yaadero puru, marĩya dupũ boarokoa. Puru masãrã, gaji dupũ neõ boabiri dupũ oparãkoa. Irasirirã neõ dupaturi boabirikoa. ⁴³Marĩya dupũre yãamakũ, boanerãya dupũ boari dupũ, turabiri dupũ daro aarã. Marĩpu marĩrẽ masũmakũ, marĩya dupũ õarĩ dupũ, turari dupũ aarĩrokoa. ⁴⁴Marĩya dupũre yãamakũ, marĩya dupũ i umuma dupũ aarã. Marĩ boanerã masãmakũ, marĩya dupũ umugasima dupũ aarĩrokoa.

Irasirirā āsū āri masía. Daporare marī i ūmuma dupure opáa. Pw̄n ūmugasima dupure oparākoa.

⁴⁵Marīp̄ya werenírī gojadea pūgue āsū āri gojasūdero āārībú: “Marīp̄ ǐgū irip̄roridi Adárē okarire sīdi āārīmí”, āri gojasūdero āārībú. Adán pw̄m̄ Jesucristo gap̄ p̄rebiri okarire sigū āārīmi. ⁴⁶Marī i ūmuma dupure opap̄roria. Pw̄guere ūmugasima dupure oparākoa. ⁴⁷I ūmuge āārīp̄roridi Adán, nikū merā irisūdi āārīmí. ǐgū pw̄m̄ marī Op̄ Jesucristo gap̄ ūmugasiguemū āārīmi. ⁴⁸Adán nikū merā iridea dup̄ dup̄kuderosū marī āārīpererā nikū merā iridea dup̄ dup̄kua. Irasū āārīmakū, ūmugasiguemū Jesucristoyarā āārīsā, ǐgūya dup̄ irirosū dup̄kūrākoa. ⁴⁹Adán nikū merā irisūdi āārīmí. Marī ǐgū irirosū dup̄kua. Pw̄n ūmugasiguemū Cristo irirosū dup̄kūrākoa.

⁵⁰Yaarā, musārē ire werea. Marīrē i ūmuma dup̄ merā ūmugasigūe Marīp̄ ǐgūyarārē dorerogūe neō waamasīna máa. I ūmuma boaburi dup̄ merā ūmugasigūe p̄rebiri okari āārīróguere neō waamasīna máa. ⁵¹⁻⁵²Masaka masībiriideare daporare musārē weregura. Jesucristo i ūmuge dup̄turi aariburi dup̄yuro āārīpererā ǐgūyarā boabirikuma. Jesucristo aaririp̄oe Marīp̄re wereboegū puridiru puritūnugukumi. Irasū puriadero pw̄n, mata kāri yoberā irirosū marī āārīpererā Jesucristore būremurā gorawayurākoa. Marī boanerā gajī dup̄ boabiri dup̄ merā masārākoa. Irasirirā neō dup̄turi boabiriko. Okarāde gajī dup̄ boabiri dup̄ oparākuma. ⁵³Marīp̄ marīya dup̄ p̄reburi dup̄re gorawayugukumi, p̄rebiri dup̄re opaburo, ārigū. Marīya dup̄ boaburi dup̄re gorawayugukumi, neō boabiri dup̄re opaburo, ārigū. ⁵⁴Marīya dup̄ p̄rebiri dup̄, neō p̄rebiri dup̄re gorawayumakū, marī boaburi dup̄, neō boabiri dup̄re gorawayumakū, Marīp̄ya werenírī

gojadea pūgue ārīderosūta waarokoa. Āsū āri gojasūdero āārībú iri pūguere: “Marīp̄ boarire béokōāmi, dup̄turi marīrē neō boabirikōāburo, ārigū. ⁵⁵Marī boakōārākoa, āri gūidea p̄reakōāa”, āri gojasūdero āārībú. ⁵⁶Marī űerō iridea waja boamurā dita āārā. Marīp̄ Moisére doreri pídea merā marī űerō irideare masía. ⁵⁷Irasū āārīkerepw̄n, Marīp̄ marī Op̄ Jesucristo iridea merā marīrē peamegūe waabonerārē taumi. Irasirirā Marīp̄re: “Ōātaria m̄”, āri, űşyari sía.

⁵⁸Irasirirā, yaarā yu mairā, musārē āsū āri weregura. Musā marī Op̄ Jesucristore būremurīrē neō piribirikōāka! Gajerā musārē ǐgūyare béodoremakū, neō béobirikōāka! Ūm̄rikū ǐgū moādorere oārō irinikōāka! Ire marī masía. ǐgū merā marī oārō āārírā ǐgū marīrē moādorere irimakū, marī moārī, ubu āārīrī neō āārībea.

Corinto marā gajerā Jesúre būremurārē niyeru sīburi neeōrīrē gojadea

16 ¹Daporare musārē niyeru neeō, musā gajerā Jesúre būremurārē sīburi weregura. Yu gajerā Jesúre būremurārē Galacia nikūgue āārīrārē dorederosūta musāde irika! ²Semanarikū siuñajārīnu^d āārīmakū, āārīpererā musā gajerā Jesúre būremurārē sīburi niyerure dukawa duripīka! M̄rōgā oparā m̄rōgā dukawa duripīka! Waawayaro oparā waawayaro dukawa duripīka! Irasirirā, yu musā p̄rogue ejamakū, musā sīburi opasiarākoa. ³Yu musā p̄rogue ejaḡn, musā beyenerārē Jerusalégue iriugūkoa. Papera pūgue āsū āri gojagūkoa: “ǐisā āārīma Corinto marā beyenerā”. Irasū āri goja odo, ǐgūsā merā iri pūrē, musā duripī neeōdea niyerure iriugūkoa, Jesúre būremurā Jerusalégue āārīrārē sīdoreḡ. ⁴Musā ȳre: “ǐgūsā merā waamakū gāāmea”, ārīmakū, ǐgūsā yu merā waarākuma.

^d 16.2 Jesúre būremurāya siuñajārīnu, domingo āārā. Domingo āārīmakū, Jesús boadigue masādi āārīmí. Irasirirā, domingo āārīmakū, ǐgūrē būremurā nerēnama.

**Pablo İgũ Corintogue
waaburire gojadea**

⁵Yũ musã p̄rogue waagũ, Macedonia nikũgue waap̄rorigũkoa. Irore tariwãgã, musã puro waagũkoa. ⁶Gajipoe irigu yoawayaripoe musã merã ããrĩgũkoa, o gajipoe irigu puibure ããrĩpeogu, ããrĩpeokõabokoa. Irasirirã musã yũ gajerogue waaburire iritamumasĩrãkoa. ⁷Yũ musãrẽ ĩãrĩ dita ĩãtariaduabirikoa. Irasirigu marĩ Opũ gããmemakũ, yoaripoe musã merã ããrĩgũkoa. ⁸Pentecostés bosenũ ããrĩmakũ, õõ Efesogueta taugũkoa dapa. ⁹Oõguere wãrĩ moãrĩ ããrã. Marĩ Opũya kerere pẽduarã wãrã ããrĩma. Irasũ ããrĩmakũ, yũ ĩrire weremakũ kãmutaduarãde wãrã ããrĩma.

¹⁰Timoteo musã p̄rogue ĩgũ ejamakũ, ĩgũrẽ õãrõ merã bokatĩrĩ, õãrõ usũyari merã ñeãka! Musã irasirĩmakũ, ĩgũ musã merã bũjowereri marĩrõ ããrĩgũkumi. ĩgũ yũ ĩrirosũ marĩ Opũyare moãmi. ¹¹Irasirirã ĩgũrẽ irasũ ĩãbéomerãta õãrõ merã ĩgũrẽ iritamuka! Musã irasirĩmakũ, ĩgũ yũ p̄rogue õãrõ usũyari merã goedujarigũkumi. Gajerã Jesũre bũremurã merã gua ĩgũrẽ yũrã yãa. Irasirirã, ĩgũ õõgue aariburire iritamuka!

¹²Apolore marĩyagu Jesũre bũremugũrẽ musãrẽ ĩãgũ waamakũ bũro gããmeadibũ. Irasirigu ĩgũrẽ gajerã Jesũre bũremurã merã waadoreadibũ. Yũ waadorekererũgũ, ĩgũ daporare waadũabemi. Pũrũ ĩgũrẽ gajino ĩriri marĩmakũ, musã p̄rogue waagũkumi.

Pablo Corinto marãrẽ õãdoretũnudea

¹³Õãrõ pẽmasĩka! Jesucristore bũremurĩrẽ neõ piribirikõãka! Gũiri

marĩrõ õãrõ gũñaturarã ããrĩka!
Marĩpu turari merã õãrõ ããrĩrikũka!
¹⁴Ããrĩpereri gajinorẽ irirã, gajerãrẽ
maĩrĩ merã irika!

¹⁵Yaarã, musã masĩa. Acaya nikũguere Estẽfanas wãĩkũguya wii marã, gajerã iro marã Jesũre bũremupũroriburi dupuyuro ĩgũrẽ bũremupũrorinerã ããrĩma. ĩgũsã, gajerã Jesũre bũremurãrẽ õãrõ iritamunikõãma. ¹⁶İgũsã ĩrirosũ ĩrirãrẽ õãrõ ĩgũsã dorerire ĩritũyaka! Gajerã ĩgũsã merã Jesucristoyare moãtaturãrẽ musã õãrõ ĩgũsã dorerire ĩritũyamakũ gããmea yũ. ¹⁷Musã merãmarã Estẽfanas, Fortunato, Acaico yũ p̄rogue ejasĩama. ĩgũsã yũ merã ããrĩmakũ, bũro usũyãa. ĩgũsã musã yũre iritamuboadeare iritamuma. ¹⁸Yũre õãrõ yũjũpũrũrũkũmakũ yãma. Musãdere irasũta ĩriũnurã. Musãrẽ gajerã p̄rogue ĩgũsã ĩrirosũ ĩrirãrẽ: “Õãrõ ĩrirã yãma”, ãrĩ werero gããmea.

¹⁹Asia nikũ marã Jesũre bũremurã musãrẽ õãdorema. Aquila, Priscila, gajerã Jesũre bũremurã ĩgũsãya wiiigue nerẽnarãde musãrẽ bũro õãdorema. ²⁰Õõ marã Jesũre bũremurã ããrĩpererã musãrẽ õãdorema. Usũyari merã gãme bokatĩrĩ, õãrõ merã mojõ ñeãnaka!

²¹Yũ Pablo, yũ basi: “Musãrẽ õãdorea”, ãrĩ gojãa.

²²Marĩ Opũre Jesucristore maĩbino wajamoãsũburo. “Gũa Opũ aarika!”

²³Marĩ Opũ Jesucristo musãrẽ õãrõ iritamuburo. ²⁴Marĩ ããrĩpererã Jesucristoyarã ããrã. Irasirigu yũ musã ããrĩpererãrẽ bũro maĩa. ĩsũ ããrã. Irasũta ããrĩburo.

Iropãta ããrã.

Pablo